


# *NZAMBE ABENGAKA MOTO TE*

## *NA KOSAMBISAMA KOZANGA*

### *KOKEBISA YE LIBOSO*

 “. . . abengaki Banje nkóto zomi,” na ntango oyo moko akokaki koboma mokili mobimba, “kasi Akufaki mpo na yo ná ngai.” Wana ezali eloko moko lokola mobóko oyo nalingi kotia mpo na liteya na ngai ya Lomingo na ntongo, soki Nkolo alingi, likoló na “Klisto azalaki nini?” Sikawa tozolikia ete ntango mosusu bana mike ya basi oyo bakoki lisusu koyembela biso lisusu loyembo yango, mokolo ya Lomingo na ntongo. Ndeko Wheeler, nalingi solo koloba ete ozali mpenza na bilenge basi mibale ya kitoko wana, ná elateli na bango, ná bipakola-pakola te mpe nyonso wana. Bazali komonana lokola Baklisto mpo na ngai, koyemba lolenge yango mpe kobika lolenge yango. Ezali malamú mingi.

<sup>2</sup> Nandimaka, ndenge nazalaki koyebisa mwasi na ngai mokolo mosusu, ete na ntembe te, awa, tozali na ebele na basi ya peto mpenza na komonana. Nasepelaka na yango. Suki na bango milai, ná bilongi ya peto, mpe baláti na kobómba nzoto. Na—na—nasepelaka na bino ntango nyonso oyo na—nakotaka awa. Nalobaki na Meda: “Nakosepela kotanda bango nyonso na molongo mokolo moko mpe kokanga bango fotó mpo nákoka kolakisa na ba-losambo mosusu ndenge losambo na biso ezalaka awa.” Mpo ntango tolobelaka makambo oyo, ba—batosaka. Mpe biso tosepelaka. Esalaka eloko moko mpo na biso. Toyebi ete ntango to—tobondelaka, soki mitema na biso ekweisi biso te, toyebi ete Nzambe ayoki biso.

<sup>3</sup> Na ntongo ya lelo, moninga na ngai moko, azalaka mosika na awa, balalisaki ye, bamemaki ye mpe a—azalaki lisusu mpenza na bomoi te, bakanisaki ete akokufa nsima na miníti moke. Babengaki ngai, ezalaki liboso ntongo étana. Nakitáki na mbéto, na nsé, mpe nabandaki kobondela mpo na mobange mobali yango mpe nakokaki, na ngolu na Nzambe, kokota na boyokani ná molimo yango, mpe ezongaki. Akómaki malamú, azongaki, bomoni, azali naino na bomoi elongo na biso na mpokwa oyo, mpo na nkembo na Nzambe. Ezali Ndeko mobange Dauch, na mibu ntuku libwa na moko, asili koleka ntango ya mobembo ya bomoi na ye na mibu ntuku mibale—ntuku mibale na moko. Kasi Nkolo azali malamú mpe atondi na mawa, na bongo, tozongisi matondi mpo na yango.

<sup>4</sup> Sikawa, Ndeko Neville, tobwakelani miso ngai ná ye mpe nayebi ete natikali kaka na mwa . . . tóloba, liyangani moko lisusu awa, mpe ekozala mokolo ya Lomingo. Mpe na—nalingi kozua ntango ya mokengeli na ngai te, nalingi kaka koyoka ye koteya.

<sup>5</sup> Mokolo ya Lomingo na mpokwa, ntango ateyaki, nayebisi bino, nakendeki kuna, ná moninga moko, na mwa restaurant moko, mpo na kolia sandwich nsima na yango, Ndeko mobali Evans ná Ndeko mwasi Evans, mpe tokutanaki kuna ná Ndeko mobali mpe Ndeko mwasi Sothmann. Ndeko mobali Sothmann ná bandeko mosusu nyonso bazalaki kolobela na ntina na liteya kitoko wana. Mpe, nayebisi bino, etikaki ngai te mposo mobimba oyo, tóloba. Moko na makambo yango ezali ndenge autruche akanisaka ete amibombi. Sikawa, ezali ya solo, ntango azindisaka motó kati na mabelé, kasi nzoto na ye mobimba ezali kaka komonana libanda. Boye, ndenge wana nde tosalaka, mbala mosusu. Tolukaka kobómba motó na nsima na eloko moko, ezalaka ntango nyonso . . . ntango mosusu tozali kaka komonana, boyebi. Amonaka biso na mobimba mpenza, bomoni. Na bongo, nasepeli na yango mpenza.

<sup>6</sup> Bongo nakanisaki, ee, nasepelaka kosolola na losambo mpe nakanisaki, ee, na—na . . . Ndeko Neville asololaka na bino ntango nyonso, boye ntango nazalaka awa, ntango mosusu nakoki koya. Nalingi kozala moto ya bilongi mibale te, mpe soko nazali na mbela moko te, to eloko moko te, náfanda kaka na ndako, wana liyangani ezali awa. Na—nasengeli . . . nazalaka na mposa ya kozala awa mpo nalingi bino.

<sup>7</sup> Nakoloba boye, ya solo mpenza, nazalaka mwa . . . Mopepe ya awa esimbaka ná ngai te, mpe ngai . . . mpe etuka oyo esimbaka ná ngai te, mpe nakokaka mpenza te mopepe oyo ezalaka awa. Kaka na ntango mopepe yango ebetaka ngai, mwa allergie esalaka ngai, na mbala moko, bomoni, mpe ezali na eloko moko te okoki kosala mpo na yango. Mpe ngai . . . Mpe tomiyokaka malamumu te, ata moko te kati na biso, ntango tozalaka awa. Bisó . . . ata moko te kati na biso azali mpenza komiyoka malamumu, banda tozalaki awa, mpo tosili komesana mwa moke na molunge makasi wana, tóloba.

<sup>8</sup> Kasi, sikawa, eloko bobele moko oyo ebéndaka ngai awa, ezali bino nyonso. Ya solo, bino nyonso. Boyebi, ókomona baninga mingi, na—nazongisi matondi mingi. Nabanzi ete na . . . soki natángi bato oyo ngai moko nayebi, bakoki kozala ntango mosusu ba-million na mokili mobimba. Na ntango moko, moto moko alukaki koyeba motango yango, mpe mbala mosusu baoyo ngai moko nayebi, bakoki kozala pene na bato million zomi. Kasi ezalaka na eloko moko na ntina na—na ntina na epai ya yo moko, na ntina na bato moko boye: Ezalaka mpenza . . . Moto nyonso azalaka na yango, ezalaka na bato ya ntina mosusu na bomoi na yo. Boyebi, ngai nandimaka yango. Soki ezalaka te, boye mpo na

nini basi na biso bazalaka ntina mosusu mpo na biso? Mpe mpo na nini—mpo na nini biso. . . Bomoni? Tozalaka. . . basi na biso, mibali na biso, mpe bongo na bongo, e—ezalaka ndenge mosusu. Mpe ezalaka na eloko wana ná baninga na yo. Ezalaka na eloko moko to mosusu oyo esalaka ete ólinga mpenza kokutana ná bango mpe kosolola na bango. Ezalaka na mwa bisika moko.

<sup>9</sup> Mpe nakoki kokanisa esika ya mai-mai oyo awa, esika mwa losambo oyo etongamaki, mpe na esika oyo, liboso étongama awa, eloko mosusu ezalaki te, kaka li—liziba. Yango wana nzela yango elekela kuna, mpo na kokima liziba yango. Oyo ezali lopango mpenza, mpe balabala eleki mpenza liboso na ekuke kuna. Mpe, kasi ezalaki liziba. Nazoyeba lisusu ntango nazalaki koya awa, mpe nazalaki koluka esika mpo na kotongela Nkolo losambo, mpe nazalaki na ngai elenge mwana mobali.

<sup>10</sup> Mpe nayokaki bango, elenge mobali oyo ná oyo mosusu awa, oyo auti kobondela kala mingi te, ná esengo nyonso wana. Namilobelaki: “Oyebi, nazaláká kokoka kobondela ndenge wana, kozanga mpenza komela péma, tóloba.” Na bongo obandi kokóma mobange, okomi kolembisa mwa moke, boyebi, mpe oyo wana. Ozali kaka kokoba, kasi okómi “na vitesse ya mibale” ndenge nayebisaki Ndeko Wood kuna. Kasi, na ntango oyo. . . Bongo, nsima na mwa ntango, okiti na vitesse ya nsé, ntango okómi pene na mibu ntuku nsambo to ntuku mwambe, nabanzi. Kasi, boyebi, e. . . ozali kaka kokende liboso, ata bongo. Na ntango oyo okoki kokende liboso, bokeseni nini esali? Etikali kaka mwa ntango moke mpo na kokóma kuna.

<sup>11</sup> Nazoyeba lisusu ndenge nazalaki kobondela, awa mpenza na kati ya matiti oyo, awa mpenza, esika eteyelo oyo etelemi sikawa, pene na esika oyo yango ezali, na esika yango nde napikáká mwa likonzi moko, na esika oyo nayebaki ete nakotia eteyelo. Nkolo Nzambe apesaki ngai esika oyo. Iyo, misie. Sikawa, kuna na kati ya libanga ya litúmu, ezali na litotoli na ngai ya emononeli oyo namonaki na ntongo oyo natiaki yango, na ntango oyo nakokaki mpenza te kokanisa, nalobaki: “Oyo ezali tabernacle na yo te, kasi sálá mosala ya mopalanganisi-Nsango-malamu,” Alobaki bongo. Natalaki mpe namonaki mokili mobimba kuna, mpe likoló ya bléu ezalaki kongenga, mpe bato bazalaki kouta bipai na bipai; ezali na kati ya libanga ya litúmu, kuna. Nakanisaki mingi mpenza te ete ekosalema, atako emononeli yango elobaki bongo; kasi ekweyaka te, ekosalema wana ata ndenge nini.

<sup>12</sup> Nazalaki na masolo mingi ná bato na mpóso oyo, mpo, mokolo ya Lomingo, Bozali ya ngolu ya Nkolo ekitaki. Mpe nasengelaki kolongwa mokolo ya mosala Moko.

<sup>13</sup> Nazali na. . . tozui naino lói te, bana. Lói na ngai eyáka nsima, mwa moke na nsima. Kasi nazali na mposa ya komema bana kolekisa mwa ntango. Basengeli kozónga mpo na kokende kelasi sikawa, na bongo nakanisaki ete mpóso oyo elingaki

kozala ntango ya malamumu. Nazokende na Chicago na mpóso oyo ekoya, na liyangani wana.

<sup>14</sup> Kasi na nsima, e—epakweli ya Molimo ekitaki, namilobelaki: “Sikawa nde ntango ya koyamba bato na masolo.” Sikawa nde ntango oyo ba . . . oyo nakoki koyamba bamosusu kati na bango kuna. Mpe ezali na . . . Namoni bato mosusu bafandi awa, baoyo bazalaki na biró. Bango bayebi soki Nkolo akutanaki na biso to te.

<sup>15</sup> Eloko ya kokamwa ezali ete . . . bato nyonso, longola kaka basi, oyo Billy akotisaki na ntango moko boye, liboso, mwasi moko ya Louisville, azalaki na mwana mwasi moko oyo azalaki awa, nakanisi bazali mpenza bato ya Eglise de Dieu na Louisville, to eloko moko ya ndenge wana. Kasi makambo nyonso, bato nyonso oyo bakotaki, liboso nátika ndako, Molimo Mosanto ayebisaki ngai banani bakozala awa, mpe eloko oyo bakosenga. Nakomáki yango na eteni ya lokasa mpe elobamaki mpenza eloko oyo bakosenga ná mituna na bango, ndenge bakotuna yango, mpe ndenge ekoyanolelama bango. Bongo, nazalaki koyebisa bango, nazalaki koloba: “Tala likambo oyo yo . . . tala sikawa, kala mingi te awa, likambo oyo Molimo Mosanto . . .” Nazalaki kosembola loboko likoló na mesa mpe koloba: “Omoni? Ayebisaki ngai likambo oyo liboso ótikala koya.” Bomoni? Kasi nazalaki kuna na ndako, nani akozala kuna mpe nini ekosalema, ezalela na bango ekozala ndenge nini, mpe nyonso na ntina na yango, liboso ná bima ata na ndako.

<sup>16</sup> Namonaki ntango oyo, mbala mingi, ntango nakozala nazoya na nzela, kobondeláká, Nakomona molongo ya mabondeli yango koleka liboso na ngai mpe koyeba nkombo nyonso oyo ekozala kati na molongo ya mabondeli, liboso kutu ná koma awa. Ya solo. Mpe kutu koyeba bisika nini bakofanda na kati ya losambo mpe eloko oyo bango . . . ndenge nini bakolata mpe ndenge nini bakozala. Okoyebisa bato makambo nyonso ya ndenge wana te. Bino . . . Ezalaka na makambo mosusu esalemaka, okoyebisa bango te. Ezalaka na ntina te ya koyebisa bango yango. Nayebisaka bato kaka makambo oyo namoni ete ekosunga bango, ntango Nkolo apusaka ngai ná yebisa bango, koloba: “Lobá oyo.” Okolinga koyebisa bato makambo nyonso oyo omonaki te, mpo ekozala malamumu te, bomoni, oko . . . na ntembe te, okokota na makambo mpe nyonso mosusu ndenge wana. Osengeli koyeba lolenge ya kokendela na makambo yango na nzela ya Molimo ya Nkolo.

<sup>17</sup> Nasílá kozua bato oyo bazalaki liboso na ngai mpe kotuna ngai mituna, oyo nayebi yango malamumu, kasi naboyaki koyebisa bango yango, mpo namiyokaki ete natindami kosala yango te. Bóyebi lisusu, nabanzi, ezalaki mokolo ya Misato na mpokwa eleki, nateyaki *Mokangami*? Bomoni? Bomoni, yo olingi koyebisa moto yango, kasi Eloko moko elobi: “Kosala yango te.” Molimo alobi: “Kosala yango te. Kosala yango te.” Nzokande likabo ezali

kotala mpenza likambo yango, bomoni. “Kosala yango te. Kosala yango te.” Bomoni, boye, malamú ósála yango te; soki te, okozua likambo ná Nzambe.

<sup>18</sup> Sikawa, toyei awa na mpokwa oyo te kaka mpo na kozala awa. Tolingi koyoka Liloba na Nkolo. Bozalaki kobondela mpe tosili kolekisa ntango malamú mingi, mpe—mpe ngai. . . mbala nyonso ntango nayaka awa, nayebi namemaka kaka mwa buku moko ya mateya, mpo ezali na. . . Mbala na mbala Ndeko Neville azalaka na boboto mingi, akóbaka kotuna ngai: “Okokosala *oyo*,” to “kosala *oyo kuna*,” to “koloba?” Mpe nákotala-tala awa kino námizwela liteya moko ya lolenge moko boye, na bongo tokobanda yango na esika wana. Mpe nandimisami. . . Sikawa, bózála mpenza mokolo ya Lomingu. . .

<sup>19</sup> Sikawa, nayebi te. . . Toyebaka ata moke te, tokoki koyeba te. Bomoni, nasílá koya awa mbala mingi ná—ná motó ya liteya moko na likanisi, oyo nalingaki kolobela, mpe nakómi awa, nabongoli yango na mobimba. Mpe nasílaki kokoma biteni ya Makomi, mpe nalobi: “Nakosalela motó ya liteya oyo, nakosalela Makomi oyo. Ndenge elandani, nakoloba *oyo* na oyo *wana* to oyo *mosusu*.” Nakomi, ndakisa, Bakolinti ya Liboso 5:15, ná Bakolinti ya Mibale 7:1 mpe Matai 28:16, mpe bongo na bongo, nakomi yango kaka ndenge wana, na nsé awa boye, mpe nakomi Makomi yango. Mpe natali kuna, nayebi oyo Likomi yango elobi kuna; mbala mosusu natikalaka kosimba yango te, ekokendela na lolenge mosusu mpenza, nyonso mobimba. Mpe toyebaka te.

<sup>20</sup> Boye sikawa, soki Nkolo alingi, nalingi koteya, mpo na kosukisa mwa molongo ya mayangani oyo uto nazali awa, mokolo ya Lomingu na ntongo, na likambo moko ya motuya mpenza. Boye, sikawa, bóya liboso ya ngonga, wana bomilengeli mpo na koumela mwa moke, ntango mosusu kino pene na ngonga ya mibale, eloko moko ya ndenge wana. Boye, ezali. . . Nasili kokoma Makomi pene na ntuku misato to ntuku minei na ntina na liteya yango, kasi nakanisi oyo yango. . . oyo nakomeka kosala, soki Molimo Mosanto akosunga ngai, ezali kosósola Nsango yango ná esika oyo Yango ezali sikawa, mpe kotonga Yango mpenza longwa na esika oyo Yango ebandaki, mpe komata na Yango kino na eleko oyo.

<sup>21</sup> Boye ntango na—nalongwe mpo na kokende na Chicago, na nsima nasengeli kokende mbala moko na Arizona, na nsima nde bipai na bipai. Mpe ekoki kozala, na boyebi na ngai, ekoki kozala na mobu ekoya, ntango mosusu na été ya mobu ekoya, liboso názonga lisusu na tabernacle, loba kaka soki nalekeli lisusu awa, mpo nazali na mayangani.

<sup>22</sup> Mpe Billy, sika-sikawa, azali kobongisa oyo ya mikili mosusu mpo na mobembo ya mokili mobimba, ekobanda semba mbala moko nsima na Nowele mpenza. Mpe mayangani ekozua ngai ntango nyonso kino pene na sanza ya Zomi na mibale, mpe,

ee, ntango mosusu mpóso ya liboso na sanza ya Zomi na mibale, na Dallas. Boye bongo—bongo na sanza ya Liboso, tolingi kobanda mobembo ya kokende zonga-zonga na mokili mobimba mpenza, tozali kobongisa yango sikawa, koluka koyeba mpenza bisika oyo Nkolo akokamba. Mpe—mpe na—nazongisi matondi mingi na . . . ata na bato, batei, na ndenge natelemelaka ba—ba-denomination na bango ná makambo ya ndenge wana.

<sup>23</sup> Boyebi, mpo na ba-buku oyo ezali kuna sikawa, Ndeko Roy Borders moto atálaka makambo ya ba-invitation, mpe kobanda Nowele, mokolo ya liboso na mobu oyo, ba-invitation esili koleka nkóto, kouta na mokili mobimba. Ah-ha. Nkóto ya ba-invitation esili koya kuna. Boye, Nkolo asengeli mpenza kokamba ngai, na bisika nini kati na yango nasengeli kokende, mpe nini nasengeli kosala. Tozali kaka kotalela Ye. Okoki kozua yango nyonso te. O—okoki kozua koleka mwambe to zomi na yangi te na eleko ya été soki esengelaki na yo na kosala yango, na—na . . . mobimba, loba kaka ókende mpokwa moko awa mpe mpokwa moko kuna, mpe ezali . . . bazali kosenga mpóso mibale ná mposu misato, mpe bongo na bongo, to na ntango nyonso oyo okoki koumela, to bamosusu na bango balobaka “ntango nyonso oyo Nkolo akokamba,” mpe—mpe nyonso ndenge wana, boye, oyebi mpenza te epai wapi kobanda to nini kosala. Boye tozali kaka kotika yango liboso na Nkolo, koloba: “Sikawa, Yo yebisa biso, Tata na Likoló.” Mpe bino bósunga ngai na mabondeli mpo na likambo yango, bomoni, bósunga ngai na mabondeli mpo tókoka kosilisa likambo yango.

<sup>24</sup> Mpe nakanisaki, nsima na liyangani ya kobondela mpo na babeli mokolo ya Lomongo eleki, bongo ntango mosusu mokolo ya Lomongo oyo, soki tozui malakisi yango mpo na kolobela yango mpe totalisi ntango oyo—oyo tozali . . . esika nini tokómi, nini—nini ezali—nini ezali—nini ezali—ntina misato ya mwango monene ya Nzambe, uta liboso ya kozalisama ya mokili, komema yango kino lelo, mwango misato ya Nzambe, mwango yango. Nazali kobongisa eteni na yango ya mibale sikawa, kobimisa Makomi yango, kolukaluka yango mpe kotia yango na bisika esengeli.

Sikawa, tótala naino, tógúmba mitó mwa moke.

<sup>25</sup> Nkolo Yesu, Mobateli monene ya bampate, tosangani awa na mpokwa oyo na Nkombo na Yo ya bulee oyo etondi na ngolu. Tolingi Yo, Nkolo, mpe totondi Yo mpo na mpokwa ya liyangani ya mabondeli oyo, mpo na banzembo ya lingomba ndenge touti koyemba ná esengo na mitema na biso, mpe—mpe toyokaki bango wana bazalaki kokota, kobetáká maboko. Na bongo tokendaki mabolongo mpe biso nyonso tosopaki mitema na biso epai na Yo, mpe totondi Yo mpo na oyo Osili kosala mpo na biso, mpe—mpe tosenge ete Ókoba kotambola elongo ná biso.

<sup>26</sup> Mpe sikawa ngonga ebelemi mpo na litangi ya Liloba mpe

koloba likambo moko, na bato. Kambá biso na makanisi na biso, Tata, mpe zua nkembo. Mpe lobá likambo moko na mpokwa oyo, na nzela na biso, oyo ekosunga biso nyonso mpo tóbima awa ná mwango moko na mitema na biso, ya kobika malamau mpe pembeni na Yo, koleka ndenge totikálá kobika. Yango nde ntina oyo tozali awa, Nkolo, tozali awa mpo na koyeba mingi koleka na ntina na Yo. Mpe tobondeli ete Ófungolela biso Ezali monene na Yo na mpokwa oyo kati na emoniseli ya Liloba na Yo, mpo tókoka koyeba lolenge ya kokóma Moklisto ya ma—malamu koleka mpe lolenge ya kosala na mikolo oyo ya nsuka. Tosengi yango na Nkombo na Yesu. Amen.

<sup>27</sup> Sikawa, miso na ngai ekwei likoló na litángi moko awa na Yisaya, Yisaya 38. Tótánga na Yisaya, Yisaya 38.

*Na mikolo yango Hijikiya abelaki malali pene pene na kufa. Bongo mosakoli Yisaya, mwana ya Amosa, ayaki epai na ye, mpe alobaki na ye ete, Yango elobi YAWE, Bongisa makambo na ndako na yo: mpo ete oko kufa, okobika te.*

*Bongo Hijikiya abongolaki elongi na ye na etutú, mpe abondelaki YAWE.*

*Mpe alobaki ete, Kanisa ngai, E YAWE, nabondeli yo, natamboli liboso na yo na bosolo mpe na motema mobongi be, mpe nasali yango oyo ezali malamau na miso na yo. Mpe Hiji . . . Hijikia alelaki makasi mingi.*

*Bongo liloba na YAWE eyaki epai na Yisaya, ete:*

*Kende, mpe loba na Hijikiya ete, Yango elobi YAWE, Nzambe na Dawidi, tata na yo, Nayoki libondeli na yo, namoni mpisoli na yo: tala, nakobakisela mikolo na yo mibu zomi na mitano.*

<sup>28</sup> Tika ete Nkolo ábakisa mapamboli na Ye na litangi oyo. Ezali likambo moko ya kafu kafu mpo na liteya ya mokuse oyo, nabanzi. Nalingi kobenga yango: *Nzambe Abengaka Moto Te Na Kosambisama Kozanga Kokebisa Ye Liboso*. Mpe tosengeli—tosengeli—tosengeli kososola mo—mobóko to efandelo na yango awa, na liteya ya mpokwa oyo, Nzambe kokébisáká moto liboso ya komema ye na liwa.

<sup>29</sup> Sikawa, moto nyonso alekaka na yango. Bisó tokoki koloba: “Ee, mbali oyo akufi kozanga likebisa.” Te, te, te. Nzambe atikálá te. . . Boyebi te eloko nini ezalaki na motema ya mbali yango, boyebi te eloko nini ezalaki koleka na bomoi na ye. Bomoni? Nzambe amemaka moto moko ata moke te na liwa, kozanga kokebisa ye liboso na ntina na yango, koyebisa ye, ezalaka eloko moko, koléngelama. Nzambe azali—azali kokonza likoló-na-nyonso, mpe A—Abétaka na ekuke ya motema ya moto nyonso, mpo na kopesa ye libaku ya koya. Sikawa, akoki na ye kokima likebisi, mpe koboya Yango, mpe—mpe kopesa Yango mokongo mpe kokima mosika, koloba: “Ah, eza kaka nde

namiyoki ndenge, ekoleka na yango.” Kasi, ata bongo, ezalaki Nzambe, Nzambe nde azalaki kosolola na ye.

<sup>30</sup> Mpe Nzambe atindaka ata moke te etumbu na mokili, kozanga kopesa bato likebisi liboso. Nzambe asálaka eloko moko ata moke te, kozanga koloba yango liboso oyo Alingi kosala. Mpe Apesaka bato makoki ya kopona, mpe bokoki—bokoki kosala bolamu to mabe. Yango nde ya Ye. . . Bomoni, Nzambe akoki kobongola lolenge na Ye—na Ye ata moke te. Mwango na Ye ekoki kobongwana ata moke te ná oyo Abandaki na yango, mpamba te Azali na nsuka te, mpe mwango na Ye ná makanisi na Ye ezali nyonso malamumu be. Boye, soki Abongoli Yango, ekotalisa ete boyebi na Ye ebakisami. Boye, lokola Azángi nsuka, boyebi na Ye ekoki kobakisama te. Mokano na Ye—na Ye ya liboso—ya liboso ezalaka ntango nyonso ya kobonga be, mpe ezali na eloko moko te ekoki ata kobongola Yango. Bomoni?

<sup>31</sup> Nzambe, liboso moto átikala kotiamama. . .ázua libaku ya kosala mabe, Nzambe atiaki ye na mobóko ya esika oyo akokaki kondima to koboya, akokaki koyamba to—to te.

<sup>32</sup> Tala, kútu, soki motei yango azali awa, Ndeko Baker, nabanzi azalaki na—na ntango ya masolo, mokolo mosusu wana, nazali na mituna na ye, oyo akomeláki ngai na ntina na momboto na nioka. Nazali na yango, ezali awa sikawa. Soki azali awa, ee, ee. . . Nazali komona ye ata esika moko te mpenza na ngonga oyo. Kasi ezali awa. Ye ná mwasi na ye, mobali moko ná mwasi moko ya ma—malamu mpenza, kasi ba—bazalaki kososola mwa makambo mosusu te, na ntina na malakisi ya momboto na nyoka, ndenge yango—yango. . .mwa mituna na ntina na oyo nalobáká, ná—ná mateya mosusu nsima na oyo wana, ná—ná kolobela likambo ya ko—kokumba zemi mpe bongo na bongo. Kasi ngai. . .na bongo, ezali bobele lokola ndeko yango, moto malamumu, akomi Moklisto ekokisi mibu mibale to misato, to mibale, kasi asósolaki te, bomoni.

<sup>33</sup> Ezalaka matata soki o. . . Osengeli kotalela Molimo Mosanto mpo Biblia oyo ekomámá na masese. Okoki kaka kofanda te mpe kotánga Yango lokola zulunále. Ebómbámá. Iyo, misie. Ndenge niní okoki mpenza kolóngisa Nzambe ntango Ayebisaki Mose kuna, ete: “Sikawa, bómeka kosala bikeko na libanga te,” na mibeko na Ye, “bómeka kosala eloko moko te, lokola, Lola, Mwanje mo—moko, to eloko mosusu, bósala bikeko na libanga te,” nzokande, kaka mokolo yango, Ayebisaki ye ete ásala Banje mibale na motáko mpe átia bango na ebonga na mawa, esika mawa ezali? Bomoni? Osengeli koyeba Nzambe mpe Lolenge na Ye liboso ókoka kosósola Liloba na Ye. A—A—Azali na fungóla mpo na Liloba yango, Ye moko, mpe bobele Ye—Ye nde Moto akoki—akoki kosalela Yango mpe kofungola Yango, na boye Ye azali Moto oyo asengeli komonisa Yango.

<sup>34</sup> Sikawa, tomoni ete Lolenge na Ye ezalaki, awa, ya kokebisa



moto ntango nyonso, liboso na kosambisama, kekebisa ekólo liboso na kosambisama, mpe bongo na bongo. Apesaka ntango nyonso likebisi na Ye, ekaniseli epai na biso, ya mokumba moko. Tozali na mokumba, mpe Nzambe atiaki biso awa na mokili na ntina, mpe ntina wana oyo Ye atielaki biso awa, tozali na mokumba ya ntina yango epai na Ye. Osengeli kokende epai na Ye mpo óyeba eloko nini Alingi ete ósala. Bomoni? Soki te. . .

<sup>35</sup> Soki okei kosala mosala mpo na moto moko, mpe apesi yo mosala na ferme, to eloko moko to mosusu, mpe yo okei kofanda na yo kuna na ebómbelo, mpe olobi: “Bongo nini?” Bomoni, osengeli kokende kotuna ye eloko nini ye alingi yo ósala, na nsima sálá yango. Soki ozali kosalala mpo na moto moko, luka koyeba oyo ntomo na yo ezali.

<sup>36</sup> Na nsima soki bomoi na biso ezali na—na mokili awa, na bongo tosengelaki kokende epai na Ye Oyo atiaki biso awa, mpe kotuna: “Nkolo, Olingi ete násala nini? Na—na—nasengeli kosala nini? Nazali awa mpo na nini?” Soki ezali kozala mama na ndako, mosukoli basáni, soki ezali kozala. . .Nyonso oyo Nzambe alingi yo ósala, na bongo sálá yango na malamú koleka nyonso oyo oyebi kosala. Ata ezali moke ndenge nini, ata ezali moke ndenge nini, osengeli kosala yango.

<sup>37</sup> Okoloba: “Ee. . .” Likambo ya mpasi ezali ete, moko na moko kati na biso alingaka kosala mosala ya moninga. Bisó nyonso tolingaka komema ndembo, ndenge balobaka, bomoni.

<sup>38</sup> Ndakisa, sáá oyo ezali awa, sikawa, koningana moke nyonso na kati kuna ezali na esika na yango. Sikawa, biteni na yango nyonso ekoki kozala makonga te. Sikawa, ngai natálaka kaka makonga mpo na komona ntango nini tokómi. Kasi soki moko na mwa ba—disque wana na kati, ebebi, ekobatela lisusu ntango oyo elóngobani te.

<sup>39</sup> Ezalaka mpe bongo ná bato. Bisó nyonso, Nzoto na Klisto, tosengeli kozala moto na moto na esika na ye, na boyokani. Bomoni? Na bongo, tokoki kotala zinga zinga mpo na komona ngonga nini tokomi. Bomoni? Na bongo mokili ezali kotala mpo na komona oyo yango ezali. Bomoni? Bomoni? Kasi bazali kolandela bino. Mpe soki ozali kaka mwa ressort ya moke, ressort ya katikati, to eloko nini mosusu, yo sala mosala ya malamú koleka oyo okoki kosala na oyo wana.

<sup>40</sup> Sikawa, lokola, tozali na mokumba moko, oyo tosengeli kozongisela monoko epai na Nzambe mokolo moko. Moto nyonso oyo ayaka na mokili asengeli kozongisa monoko epai na Nzambe mpo na mokumba moko. Mpe, mingi kati na biso, tosengeli kozongisa monoko mpo na boyangeli. Bisó. . .Mokumba oyo ezali boyangeli oyo epesameli biso na Nzambe, ézala na eloko nini. Ndenge nauti koloba kala mingi te mpo na “mama ya ndako”, boye zalá mama ya ndako ya solosolo. Ezali solo. Soki ezali ete ózala mosali bilanga, zalá mosali bilanga ya solosolo.

Nyonso oyo Nzambe apési yo kosálá, ozali moyangeli na yango, osengeli kozongisa monoko mpo na yango liboso na Nzambe, mpo esengeli na makambo nyonso oyo mpo na kosala yango.

<sup>41</sup> Eyebisámáki na Hizikiya ámbongisa mpe ámilengela mpo asengelaki kokutana ná Mokeli na ye. Sikawa, Hizikiya azalaki mokonzi, mpe mo—moto monene. Bomoni ndenge asengaki na malómbó awa? “Nkolo, nalómbi Yo ete ótala likambo na ngai malamamu. Na—natámbolaki liboso na Yo ná motema mobongi be.” Oyo ezali mpenza litatoli mpo na—mpo na—mpo na biso lelo, oyo esengeli kozala mpo na moto oyo azali kotambola liboso na Nzambe.

<sup>42</sup> Kutu liwa esakolamaki likolo na mobali yango, ata bongo Nzambe abongolaki likanisi na Ye na ntina na ye, mpamba te Hizikiya azalaki na mposa ya kosala likambo moko, mpe Nzambe alobaki ete Ye “akopesa biso bamposa ya mitema na biso.” Mpe ntango ya Hizikiya esilaki kokoka, mpe a—abelaki bokono ya cancer, to eloko moko to mosusu, mpe—mpe bazalaki kobenga yango “bibó” na eleko wana, kasi toyebi ete, na momesano, ba-bibó ebomaka te, ebikisamaka na yango. Kasi ezalaki ntango mosusu cancer, mpe epasukaki lokola bibó. Mpe—mpe Nzambe ayebisaki Yisaya, ete: “Kende kuna mpe yebisa ye ete akokufa.” Mpe Hizikiya azalaki naino na likambo moko oyo alingaki kosala. Azalaki na—azalaki na . . .

<sup>43</sup> Soki osengi eloko moko epai na Nzambe, osengeli kozala na ntina mpo na yango. Ezali kaka lokola Likomi oyo nalobelaka mbala mingi ete: “Soki olobi na ngomba oyo: ‘Longwá wáná,’ mpe otii ntembe te, kasi ondimi ete oyo olobi ekokokisama, okoki kozua oyo olobi.” Sikawa, yango ekonzamaka mobimba na mposa mpe ntina oyo ozali kolanda, bomoni, soki te, ekosalema te. Bomoni?

<sup>44</sup> Okoki kaka te kobima awa . . . Nde esika wana mingi kati na biso tosalaka mabunga mingi, ezali ntango tokendeke koloba: “Sikawa, nakolakisa yo ete nazali na kondima ya kosala likambo oyo.” Sikawa, ozali na libunga, mpo na kobanda. Nzambe apesaka bato makabo te kaka mpo na kosakana na yango.

<sup>45</sup> Ndenge nazalaki koloba kala mingi te, Amonisaka bato bimononeli te kaka mpo na kosakana na yango. Ezali eloko ya kosakana na yango te. Ezali eloko ya búlee. Sáléláká yango kaka na . . . ndenge Nkolo akopesa yo nzela. Zalá mokangami na Ye. Ata ozali na mposa ndenge nini ya koyebisa moto wana ete azali na libunga, mpe likambo oyo, oyo kuna, to oyo mosusu, fándá kimia kino ntango Nzambe akopesa yo nzela. Na nsima, ntango Nzambe apesi yo nzela, na ntango wana okoki koya na YANGO ELOBI NKOLO! Soki te, bósana yango.

<sup>46</sup> Mo—mokili ya lelo ekómi mpenza lokola Hizikiya azalaki na eleko wana, esili kokebisama. Ezali kokoba kokebisama. Lingomba ezali kokebisama. Mpe, sikawa, makambo oyo

esalemaka kaka na—na mpwasa te. Nyonso ezalaka na eloko moko nsima na yango.

47 Sikawa, Hizikiya, lokola azalaki kobela, azalaki na bibó oyo, ezalaki na mpwasa te. Nzambe atindaki Yisaya kuna mpo na koyebisa ye ete átia ndako na ye na molongo, mpo akokufa. Mpe Hizikiya alelaki, mpe ayebisaki Nzambe ete: “Natambolaki liboso na Yo ná motema mobongi be mpe na—nasengi Yo ete óbatela bomoi na ngai na ntina moko, ntina moko ya malamumu, ntina ya Nzambe.”

Nzambe ayebisaki mosakoli, alobaki: “Zóngá mpe yebisa ye.”

48 Sikawa, ezali kokamwisa te? Hizikiya azalaki moto ya monene koleka bato nyonso na mboka yango. Bomoni? Hizikiya azalaki mokonzi, mpe mosantu. Azalaki mobali ya solosolo, soki akokaki kosenga likambo yango liboso na Nzambe mpe Nzambe apamelaki ye te mpo na yango, “Natámbolaki liboso na Yo ná motema mobongi be,” sikawa, oyo wana elingi koloba mingi. Bomoni?

49 Mpe Nzambe alobaki ata moke te: “Te, Hizikiya, otambolaki bongo te,” kasi Andimaki ete atambolaki bongo. Mpe Alobaki: “Nako—Nakobatela lisusu bomoi na yo mwa ntango molai.” Bomoni? “Nakopesa yo bosenga na yo,” bomoni, mpo azaláki moyengebene, azaláki mo—mosali ya solosolo mpo na Klisto.

50 Na bongo tómiyokaka ete tozali na ndingisa ya kosenga eloko moko soki—soki ntina na biso ezali malamumu, na nsima mposa na biso na ntina na likambo yango.

51 Sikawa, tozali komona lelo ete, na mibu mingi oyo eleki, nakoki koloba na mibu zomi na mitano oyo eleki, to koleka, ete likebisi moko ezalaka ntango nyonso kotambola na ekólo mobimba, ete: “Bóbongola mitema, tó bokokufa!”

52 Bótala, lelo, nazalaki kosolola ná mwasi na ngai na ntongo-ntongo oyo, mpe ngai...na ntongo-ntongo, ntango tozalaki kolia, tofandaki na mésa mpe tozalaki kosolola liboso nábima. Nalobaki: “Mwasi na ngai...” Azalaki koloba na ntina na Billy Graham, mpe na ntina na mwasi na ye, ndenge bamekaka kobika lokola bato nyonso ná nyonso wana. Nalobaki: “Azali mpenza mosali ya solosolo, ntango alukaka te...ntango ye...moto oyo, ntango mosusu, azuaka ba-milió mibale to misato na mobu moko na mayangani na ye, kasi azuaka yango te, fondation na ye nde ezuaka yango, ezungisaka yango na mosala ná ba-emision, mpe bongo na bongo. Mpe Billy azuaka pene na nkoto ntuku mibale na mitano na mobu moko.”

53 Alobaki: “Ndenge nini akoki kosalela nkoto ntuku mibale na mitano na mobu moko?”

54 Nalobaki: “A—azuaka kaka oyo asengeli kozala na yango, esili. Azali na ndako ya kofuta, ná nyonso wana.” Nakobaki,

mpe nalobaki: “Namémiaka Billy Graham mingi,” nalobaki, “mpo azali na nsango moko, mpe nsango yango ezali kobongola motema.”

<sup>55</sup> Na bongo, nalobi na bino, ezali na moto moko te oyo ngai nayebi, oyo na kati ya mboka lelo, oyo Nzambe asáleli ná nsango yango lokola Billy Graham. Oh, alakisaka yango malamú mpenza, mpe atelemaka kaka wana mpe, nalingi koloba, abéngaka bato ya politiki ná bandimi ya mangomba na kobongola motema. Kasi asukaka kaka wana.

<sup>56</sup> Ndeko Oral Roberts mpe ye oyo, mosali monene mosusu ya Nkolo. Mpe ezali na moto moko te kuna, oyo akokani na Oral Roberts. Bompikiliki ya kosala wana ya—ya kobenganáká milimo mabe mpe kobéleláká Nkombo na Nkolo ná—ná mwa kotúntuka, mpe bongo na bongo, na ntina na lobiko na nzoto uta na Nzambe. Ezali mpenza ya solo. Ezali na motindami moko mpo na ba-Pentekotiste.

<sup>57</sup> Ezali na motindami moko oyo atindami na mokili ya mangomba ya denomination, bomoni, ná mokili ya malili.

<sup>58</sup> Na nsima bó тала zingazinga, na mwa lotomo na biso ya komikitisa oyo, esika ezali “Yesu Klisto motindo moko lobi, lelo, mpe libela,” bomoni. Ezali kosala nini? Ezali kobenga etonga ya Mwasi-na-libala, bomoni. Bomoni? Bomoni, e—ezali kobenga bato uta na bitonga nyonso mibale. Ezali kolongola Eyika na eyika. Bomoni oyo nalingi koloba?

<sup>59</sup> Na bongo, Nzambe azali kotatola nsango oyo Billy Graham ateyaka. Nzambe azali kobikisa babeli na mabondeli ya Oral Roberts. Mpe Nzambe azali komonisa makambo oyo Yesu... azali kotalisa polele ete Yesu Klisto azali ndenge moko lobi, lelo, mpe libela. Mpe ezali kobenga makambo oyo... Ezali bansango ya eleko oyo. Mpe moko na moko na bansango yango ezali kobelela: “Bóbongola mitema, tó bokokufa!” Ezali solo. “Bóbongola mitema, tó bokokufa!” Elikia ezali lisusu te, nyonso esili. Mokili esili kokebisama na ntina na Boyei na Ye. Moko na moko na bansango yango ezali kolobela mpe kokebisa na ntina na Boyei na Nkolo Yesu, ná ba-denomination ya mangomba ná... .

<sup>60</sup> Bómikanisela, Nzambe azalaka ntango nyonso na misato. Lokola Tata, Mwana mpe Molimo Mosanto; mpe kolongisama, ná libat-... . kobulisama ná libatisi ya Molimo Mosanto; mpe bongo na bongo; Azalaka na misato.

<sup>61</sup> Sikawa, Nzambe azali nsango wana ya kobongola motema epai na lingomba ya nkombo. Nzambe azali na kati ya nsango wana ya lobiko na nzoto uta na Nzambe, epai na lingomba Pantekotiste. Nzambe azali na kati ya Nsango oyo etindami epai na Mwasi na libala. Bomoni? Boye, tomoni ete kobenga nyonso wana, moko na oyo, oyo na oyo *kuna*, mpe oyo kuna na oyo *mosusu*. Nzambe azali kobenga lingomba kobima na mokili;

e. . . kobenga lingomba kati na, lingomba ya denomination na kati ya Pantekote; mpe kobenga Mwasi na libala uta na ba-Pantekotiste. Bomoni?

<sup>62</sup> Lokola Luther, Wesley, mpe sikawa. Bomoni, etalisami mpenza malamumu be mpe ezali na libunga ata moko te na ntina na yango. Nasíla kolobela nyonso na mobimba na yango, mpe bangambo na yango, na kati mpe libanda na yango, mpe natálasiki yango na nzela ya Makomi, kolandana ya ntango na yango, kino toyebi ete ezali mpenza Solo. Bomoni? Ezali na libunga moko te. Mokolo ya Lomingo, nazolikia ete Nzambe akokotisa yango mpenza na bozindo na lolenge ete bokokoka kotángwá na yango ata moke te. Bomoni?

<sup>63</sup> Sikawa, Nzambe azali kopesa likebisi: “Bómilengela mpo na kosambisama.” Ba-bombe atomique ezali na kati ya bibombelo, nyonso esili koléngelama. Mpe Nzambe, liboso Ákoka kopesa nzela ete likambo yango ésalema, Atindaka mbela na bisika nyonso, ndenge Asálaki na Sodoma, “Bóbima kuna. Bómilengela. Likambo moko elingi kosalema.”

<sup>64</sup> Lokola na mikolo ya Nowa, liboso Nzambe átinda mai mpo na kobevisa mokili na eleko monene liboso na mpela, oyo bato bakótaki mpenza kati na masumu, ndenge Yesu alobaki polele ete mokolo yango ezalaki mokolo kaka lokola oyo. “Ndenge ezalaki na mikolo ya Noa, ekozala mpe bongo na boyei ya Mwana na moto.” Basi balekisaki ndelo mpenza, mpe—mpe bákobaláká mpe kobalisáká, ná—ná misala minene ya science, ná bato ya mayele mingi oyo bamipesaki na ngámbo ya mayele ya bongó, mpe Etonga moke ya komikitisa bafandaki mosika na ngámbo moko, kozeláká kosambisana oyo ezalaki koya ná ekimelo. Mpe liboso Nzambe átinda kosambisama yango, Atindaki mosakoli moko. Um-hum.

<sup>65</sup> Kaka ndenge Asalaki mpo na Hizikiya, Alobaki: “Milengela, mpo kosambisama ebelemi mpo na kokweya.”

<sup>66</sup> Mpe asálaki ete bato bámilengela mpo na ntango yango. Noa asalaki ete bato bámilengela, mpe ezalaki mbela ya mawa liboso na kosambisama.

<sup>67</sup> Ninive ekebisamaki liboso na ntango na bango. Nzambe akitisaki miso na Ninive, mpe Alobaki: “Na—Nayoki nkele mpe Nalembi makambo oyo.” Na—na—nasosoli ete—ete e. . . ata ekóló monene oyo, ya bapakano, ya bato ya Mabota. . . Engumba na bango, ndenge ezalaki na mikolo wana, bazalaki kosambisa bango na engumba na bango; lelo esalemaka nde na bikólo, lelo, nsima na bato kopanzana ndenge ekomi. Alobaki: “Engumba monene wana emipesi mobimba na masumu.”

<sup>68</sup> Mpe Nzambe, liboso Átinda kosambisama, Atindaki nsango ya likebisi ete: “Bóbima! Bómisembola!” Bótala malamumu, mosakoli yango atikálá koloba eloko moko te, kaka—kaka

komi...Alobaki: “Na mikolo ntuku minei, engumba oyo ekobebisama.”

<sup>69</sup> Mpe, oh, mbala mosusu ezalaka mpasi kosala makambo lokola wana, koyebisa bato. Soki mosakoli yango akengeli te, akokota na mobulu, mpo ekozala lokola akei na ngámbo moko, koluka kokómisa yango pete, to kokakola mwa moke awa mpe mwa moke kuna. Kasi mosakoli ya solosolo, oyo azui motindo uta na Nzambe, asengeli kokakola ata moke te eloko moko, asengeli kotia yango nyonso na molongo.

<sup>70</sup> Yango nde ntina Asálelaki molimo ya Eliya mingi mpenza, bomoni, mpo molimo wana ezalaki ntango nyonso kotósa mitindo na Ye. Bomoni? Bomoni, ekokisaki mitindo na Ye ndenge Epesamaki mpenza, mpe ntango nyonso ezalaka, “Bózonga na Liloba!” Bomoni? Ezóngisaka bango ntango nyonso na Liloba.

<sup>71</sup> Sikawa, tomoni Ninive na masumu. Mpe mosakoli azalaki kotatabana mpo ezalaki mokili ya Mabota, bomoni, ezalaki ekólo ya Mabota, bato ya Mabota; bato na ye moko te, ezalaki Baebele te. Bazalaki bato ya Mabota. Masuwa monene, Ninive ezalaki libongo ya mombongo pene na mbu, ba-industrie minene ya bolóbi-mbisi ezalaki kuna, bato bazalaki kolóba mbisi. Mpe—mpe ba—bazalaki na . . . esengelaki kozala mboka moko ya masumu mingi mpenza. Etondaki na mbongo; mpe—mpe esika mbongo ezalaka mingi mpenza, mpe bato balandaka makanisi ya bato ya mokolo yango, masumu ná mobulu ekotaka kuna ntango nyonso.

<sup>72</sup> Nzambe alembaki yango. Boye Azalaki na mosakoli moko na kati ya mboka, boye Alobaki na mosakoli na Ye: “Kende kuna, na Ninive, mpe gángá, mpe lobá: ‘Na mikolo ntuku minei oyo engumba ekobebisama.’”

<sup>73</sup> Sikawa, Yona amilobelaki sikawa: “Boyebi, nakoki kozua mwa mokakatano.” Boye alingaki koyeba solo mpenza, boye akanisaki ete ázua mwa lói mpe—mpe ákende na Talasisi. Mpe tomoni ete . . . etikalaki kaka mikolo ntuku minei. Bomoni?

<sup>74</sup> Nsango ezali likambo ya noki-noki, ntango ekómi pene. Kosala maseki ná makambo mosusu te, mpo na koluka diplome ya Licencié en Lettres mpe na kososola likambo moko boye. Ngonga ekómi pene! Yango nde likambo ná bato lelo, tozali koluka kotonga biteyelo minene mpe kozala na biloko minene ya ndenge wana. Nzokande mawa . . . Ólala! Soki toteyaka Boyei na Nkolo, tozali koluka nini ná biteyelo? Tosengeli kobongola mitema epai na Nzambe! Bomoni?

<sup>75</sup> Ndenge Hudson Taylor alobaki na elenge misionére wana, alobaki. . . To, na elenge ya Chinois moko ayaki epai na ye, alobaki: “M. Taylor,” alobaki, “Nkolo Yesu atondisi ngai na Molimo na Ye.” Alobaki: “Na—nazali mpenza na esengo!” Alobaki: “Esengeli na ngai sikawa kozua mibu zomi mpo na kozua ba-diplome ná nyonso wana?”

<sup>76</sup> Alobaki: “Mwana, kozela ba-diplome te. Soki mwinda epeli, kende koloba Yango! Kende koloba Yango. Kozela ba-diplôme te. Te. Mótó na yo ekokóma pene na kozímána liboso ósilisa kozua ba-diplôme.”

<sup>77</sup> Tika ete, ntango epeli, soki oyebi eloko mosusu te, loba kaka ndenge epelaki. Kasi—kasi komeka kozua esika ya moto mosusu te, to esika ya eloko moko. Ntango oyebi yango, loba kaka oyo oyebi ete ezali Solo, “Boye nde ndenge Yango eyélaki ngai, mpe nde ndengo oyo namiyokaki na ntina na Yango.” Ezali. . . Soki yango nde nyonso oyo oyebi, lobá yango! Tókende! Nsango ezali likambo ya noki-noki, ntango ekómi pene.

<sup>78</sup> Sikawa, bongo soki Yisaya álobaka: “Ee, sikawa nakozela mpo námona liboso ndenge akozala ná bibó yango, bomoni. Bomoni ndenge—ndenge nini e. . .?”

<sup>79</sup> Bomoni, Nzambe ayebisaki ye: “Kende kuna mpe yebisa ye, sika-sikawa!” Bomoni?

Mpe Ayebisaki Yona ete ákende. Ólalá!

<sup>80</sup> Ntango akómaki kuna, na kati ya mai-na-mbu wana, na kati ya mbu ya bozindo wana, mpe—mpe mopepe makasi ekómaki koningisa masuwa yango, bautaki kotómbola elamba ya masuwa kasi bazalaki kaka kozunguluka, bakómaki komituna soki ezalaki mpenza likambo nini kuna. Kasi bakokaki kosósola te, ezalaki lokola masuwa yango etóndaki na mai. Mpe—mpe moto nyonso akómaki kobélela nzambe na ye, mpe na mbala moko. . . Yona azalaki na lói, na bongo amilobelaki ete akokaki na ye kolala, mpe, na ntembe te, akitaki na nsé na kati ya masuwa, mpe alalaki kuna, makolo atomboli, alalaki mpongi. Mpe alobaki: “Lamuka, E goi-goi, mpe bélélé Nzambe na yo!” Mpe Yona ayebaki nini ezalaki kotambola malamau te.

Ezali mpe bongo na moto nyonso oyo ayebi nini ezali kotambola malamau te lelo! Bomoni?

<sup>81</sup> Mpe alobaki: “Nyonso wana ezali fóti na ngai. Bózua ngai, bókanga ngai maboko mpe bóbwaka ngai na kati ya mbu, na bongo, mindondo oyo ekosila.” Bazalaki, tóloba, bilenge mibali malamau mpe balingaki kosala yango te, kasi bamonaki ete azalaki mosakoli mpe ayebaki eloko oyo azalaki kolobela. Alobaki: “Na—nakanisaki názua naino lói, kasi—kasi Nkolo alingi te ete názua lói yango. Nasengeli kokende kuna, nazali na mosala ya kosala. Nakanisaki ete nakopema mwa moke liboso nákende, kasi nasengeli kokende. Nsa—nsango yango ezali ya noki-noki, nasengeli kokende kuna.”

<sup>82</sup> Nakoki kokanisa, ntango mbisi moko boye wana, oyo ebongisamaki, emelaki Yona na libumu na ye, ebalukaki mpe ezalaki kobwaka mai na mboka mobimba, mpe ekendeke na Ninive na mbangu na yango nyonso. Nzambe azalaki komema nsango yango kuna, kati na mbisi moko wana oyo ebongisamaki. Mpe ekendeke na Ninive na mbangu na yango nyonso mpenza,

mpo e—ezalaki na motindami na kati na yango mpe esengelaki komema ye kuna. Azuaki masuwa oyo esengelaki te, kasi Nzambe asilaki kobongisela ye masuwa moko.

<sup>83</sup> Boye, boyebi, Nzambe azali na makoki ya kosala makambo minene soki tokolinga bobele koyoka Ye. Bomoni? A—Akofungola—Akofungola ba-nzela na esika oyo nzela ezali te. Ye *azali* Nzela. Bomoni? Mpe ntango Nsango yango ekómi mpenza likambo ya noki-noki, ndenge Ekómi lelo, Nzambe abongisaka nzela.

<sup>84</sup> Tomoni lisusu ntango Amosa . . . Nateyaki na ntina na mobali oyo, Amosa. Soki bolingi kotánga lisolo yango na ntango moko, ezali malamú mingi, bótánga lisolo ya Amosa, na mokapo ya liboso ya Amosa. Azali elilingi mosusu ya—ya makébisi liboso kosambisama ébeta lisumu. Sikawa, engumba oyo azalaki kokende kokebisa, kuna, ezalaki etonga ya Bayuda oyo—oyo babimaki mwa moke libanda na nzela, mpe oyo ekómaki mboka monene ya ba-touriste. Mpe—mpe nabanzi, ndenge napesaki ndakisa yango na ntongo nateyaki na ntina na ye, ete, ntango motó na ye ya libandi oyo emonanaki likoló na ngomba mpe mwa miso na ye ekómaki mike, wana akitisaki miso mpe amonaki masumu ya ekólo monene ná bato minene wana, wana alekisaki misapi na mandefu na ye ya mpembe ndenge wana. Ólalá, oyo nde likambo! Kasi moto moko te ayebi esika autaki.

<sup>85</sup> Moto moko te ayebaka basakoli yango, babimaka uta na esika moko, mbala moko, mpe bakendeke ndenge moko.

<sup>86</sup> Kasi akotaki na engumba yango ná “YANGO ELOBI NKOLO! Bóbongola mitema, tó bokokufa! Mpamba te Nzambe akobebisa ekólo oyo. Ako—Akolongola esika oyo na mabelé. Bosilí kosálá boyokani ná monguna na bino. Mpe bokanisi ete boza—boza na kimia ná monguna na bino, kasi na ntango nyonso oyo, Basulía bazali—bazali kotonga kuna. Bokoki kotambola elongo te, bato mibale, soki boyókani te. Esili.” Boye, alobaki . . .

<sup>87</sup> Mpe Nzambe alingi ete tókabwana. Alingi ete “tóbima na mokili,” ete tomeke te kobika ná mokili ná Nzambe na mbala moko, ete tómeke te kolanda ndakisa ya mokili ná Nzambe mbala moko. Osengeli kobika mpo na Moko to mosusu, osengeli kondima Moko to mosusu.

<sup>88</sup> Mpe sikawa tomoni ete, Amosa oyo, na ntembe te, asakolaki kosambisama likoló na bato yango soki babongolaki mitema te. (Mpe—mpe, ólalá, e—ekokani mpenza na eleko na biso.) Nakanisi engumba monene oyo, na kotaláká lisusu likambo oyo, engumba monene yango, kuna, ete emipesaki mobimba, mpe—mpe bazalaki na nkita monene ya biloko nyonso, bazalaki kofúluka. Mpe bakanisaki ete bazalaki mpenza na mokano na Nkolo, mpo bazalaki kofúluka. Kasi bayaki komóna ete Nzambe azalaka ntango nyonso te mobandisi ya bofúluki. Te,



Nzambe... Mbala mosusu, ntango bofúlukeye eyáká, lingomba ekendeke mbala mingi mosika na Ye.

<sup>89</sup> Boyebi, mokolo moko, Nzambe alobaki na ntina na Yisraele, Alobaki: “Nakutaki yo ná makila na lisobe, nasukolaki yo mpe nakólisaki yo,” mpo na kozala mwana na Ye Moko. “Na nsima, ntango okoli, mpe okómi elenge mwasi kitoko, obikaki lokola mwasi ya ndumba.” Alobaki: “O—o—okómi komipesa na balekinzela nyonso.” Bomoni? “Kasi ntango ozalaki mobóla mpe na bosenga, ntango—ntango ozalaki na bosenga, osálelaki Ngai. Kasi ntango Napámolaki yo mpe Napesaki yo bozui mingi, okendeke mosika na Ngai.” Mpe etalisami polele ete ezalaki mpenza bongo. Ólalá!

<sup>90</sup> Sikawa, tomoni ete mosakoli oyo abetaki mpenza ekólo yango, Amosa oyo. Azalaki kaka mosali-bilanga. Kasi tomoni ete ntango asalaki bongo, nsima apámelaki mpe ayebisaki bango eloko nini ekosalema, mpe ayebisaki bango ete soki batósi Nzambe te, monguna oyo bango basalaki boyokani na ye, ye mpenza nde akobebisa bango.

<sup>91</sup> Sikawa, tomoni ete Amerika na biso ya lipambú ekokima nkanda na Nzambe te. Ndenge nalobaki mokolo moko uta nazali awa, nandimisami ezalaki awa, na makambo nyonso, na nsuka. Boyebi, na—nakoki komona eloko moko te mpo na kotonga likoló na yango. Okoki kotonga likoló na politiki te, esili kobeba. Okoki kotonga likoló na bomoi malamumu ya bato te, mpo ezali lisusu na bomoto te. Ezali na—ezali—ezali na eloko moko te, oyo okoki kotonga likoló na yango. Mpe okoki kotia elikila na eloko moko te.

“Bongo lingomba?”

<sup>92</sup> Ee, okoki kosala eloko moko te ná lingomba, etikali kaka na makambo ya libanda mpe esili kobeba, eloko moko te etikali. Basili koteka makoki na bango ya bokulutu mpo na supu ya madesu, mpe bazali kozela kaka kosambisama. Molimo Mosanto esili kotambola na ekólo oyo mobimba, kolakisáká bilembo mpe bikamwa na Ye, kasi bazali kokóba koboya ngolu na Ye. Azali komitatola mpe komitalisa polele Ye moko, na nzela na matatoli minene na Ye, ete Azali Liloba na Nzambe oyo emonisami na eleko oyo. Kasi bazali kaka koboya Yango. Bomoni? Eloko moko te etikali sikawa. Bokoki ntango nyonso kosala yango na Nzambe te. Bomoni?

<sup>93</sup> Malamumu, tomoni ete, ya liboso, Atindaka basakoli na Ye ná likebisi. Abongolaka lolenge na Ye te, lolenge na Ye ya kosala makambo.

<sup>94</sup> Abetaka ntango nyonso te, ntango Akebisaka. Nalingi ete bolanda maloba oyo malamumu. Nzambe akebisaka kasi Abetaka ntango nyonso te na ngonga moko oyo Akébisaka. Bomonaki yango? Lisusu, soki Abeti te ntango Atindi likebisi, na ntango

wana bato batiólaka mosakoli yango, balobaka: “Ozalaki na Yango te. Obúkaki lokuta. O—ozalaki na elónge te.”

<sup>95</sup> Mpo, likambo yango moko ntango mosusu elobomaki na—na Yisaya. Bokanisi bato bakanisaki nini ntango akendeki kuna mpe asakolaki ete mokonzi “akokufa,” nsima azongaki kuna mpe alobaki: “Te, akokufa te”?

<sup>96</sup> Bongo mpo na Yona, ntango azalaki kotambola na babalabala, koloba: “Oh, engumba oyo ekobebisama na mikolo mingi boye, na mikolo ntuku minei,” na nsima Nzambe asalaki yango te?

<sup>97</sup> Bomoni, bosengeli kosala kéba, Nzambe abétaka ntango nyonso te na ntango oyo Akebisi. Kasi A... Eloko moko esalemaka, nsima na yango, bato batiolaka mosakoli yango. Kasi soki azali mosakoli oyo atitolami ná Liloba na Nkolo, bomoni, bilembo ya Nzambe, oyo etitolami, ndenge Nzambe alobaki ete mosakoli akotitolama (ndenge bato wana bazalaki), bomoni, Liloba na ye ezali ya ye te, kasi ezali ya Nzambe, mpe ekokisama. Esengeli kokokisama soki Ezali Liloba na Nzambe. Eloko bobele moko oyo ekoki kopekisa yango, ezali, kobongola motema noki-noki.

<sup>98</sup> Bótala, Amosa, a—aumelaki mpe amonaki lisakoli na ye. Kasi ntango Amosa alobelaki engumba yango, ndenge elingaki kosálema, ndenge Nzambe alingaki kosala ete Basulía báya kobotola bango yango, mpe bongo na bongo, mpe ndenge libebi na bango moko ekosilisa bango, ee, nabanzi, soki ezali solo, sikawa, nazali kobwaka miso awa na Likomi yango, mpe soki natangaki yango malamú, esalemaki pene na mibu ntuku mitano nsima na Amosa kosakola. Mpe, sikawa, bokanisi nini? Ekeke mobimba elekaki liboso lisakoli ya Amosa ékokisama. Kasi soki botángi awa, elobi na bino, ete ekokisamaki mpenza liloba moko moko oyo ye alobaki. Bomoni?

<sup>99</sup> Yoane amonaki Buku ya Emoniseli. Etikálá kosalema te na eleko na ye. Kasi tozali komona yango kokokisama mpenza. Bomoni?

<sup>100</sup> Daniele asakólaki mpo na mokolo yango, mpo na mokolo na ye mpe bileko nyonso oyo elandi. Aumelaki ata moke te mpo na komona yango. Alobaki: “Leká na yo, Daniele. Kangá buku—buku, mpe—mpe kangá buku. Mpe okolála na libula na yo, kasi na mokolo yango, okotelema.” Bomoni?

<sup>101</sup> Sikawa, bomoni, e...ezali te ete ntango nyonso... Nzambe... abetaka mbala moko ntango Asakolaka. Lisakoli ya Amosa, ndenge nalobaki, nsima na mibu ntuku mitano, nde ekokisamaki. Kasi ekokisamaki mpenza!

<sup>102</sup> Na bongo, mosakoli azali—azali...oyo ya Biblia... Mosakoli ya solosolo azali moto moko ndéngé. Moto moko “ndéngé” te, oyo akeseni ná bato mosusu nyonso, kasi azali na mosala moko ya ndéngé mosusu. Bomoni? Mpe, lokola azali na

etinda moko ndéngé, asengeli kozala ndéngé mosusu (mwa moke libanda na momesano na bamosusu) mpo na kosala yango.

Ezali lokola Nzambe akokanisaka *basakoli* na Ye na “mpongo.”

<sup>103</sup> Sikawa, mpongo azalaka ndeke moko ndéngé. Azali kaka ndeke, kasi azalaka ndeke moko ndéngé. Akoki kopumbwa likoló koleka bandeke mosusu. Akoki komona mosika koleka bandeke mosusu. Mpe, sikawa, mpo na komatá likoló koleka, asengeli kosalema na lolenge ete akoki komata likoló koleka. Mpe ekosunga ye na nini, komata kuna likoló, soki akoki koyeba te eloko nini azali kosala nsima na ye kokóma kuna likoló? Bomoni? Boye, asengeli kozala ndeke moko asálema ndéngé. Bomoni? Azali mwa moke na—na lolenge ya libota ya ba-faucon, “apasolaka mabumu na monoko na ye”. Mpe aliaka...mingi kati na bango bazalaka balei-bipolí. Ezalaka na bampongo ya ndenge na ndenge pene na ntuku-minei.

<sup>104</sup> Kasi, bomoni, na losambo mokengeli azalaka, mpe mokengeli yango azali moto moko ya ndéngé. Asálémá na lolenge ete akoki—akoki koyikela mpiko mindondo ya bato. A—a—azali momemi-mokumba, azali ngombe ya etonga. A—azali moto oyo akoki kofanda na ntango oyo...moto moko azali na likambo ná moto mosusu, ye akofanda elongo ná mabota mibale wana (kozanga kopona ngámbo moko) mpe, kosolola likambo yango, mpe kozongisa kimia na bopolo nyonso. Bomoni? A—azali mokengeli, ayebi lolenge ya kobongisa makambo.

<sup>105</sup> Evangeliste azali moto moko ndéngé. Azali moto oyo apelaka lokola libungutulu ya móto. Akokóta na engumba moko mpe akoteya liteya na ye, bongo akobima wana mpo na kokende esika mosusu. Bomoni, azali moto moko ndéngé.

<sup>106</sup> Molakisi azali moto moko ndéngé. Afándaka na nsé ya epakweli ya Molimo, mpe azali na makoki ya kozua Maloba mpe kosangisa yango, na nzela ya Molimo Mosanto, na lolenge ete mokengeli to evangeliste, ata moto to mosusu, akoki komikokanisa na ye te.

<sup>107</sup> Na bongo, tomoni ete, ntoma azalaka moto moko ndéngé. Azali—azali “motíi-na-molongo.” Azali moto oyo atindami na Nzambe mpo na kotia makambo na molongo.

<sup>108</sup> Mosakoli azalaka moto moko ndéngé. Mosakoli azali moto oyo Liloba ya Nkolo eyaka epai na ye, mpo mosakoli asálema mpenza bongo (bomoi) ete lisosoli na ye ya kati ná lisosoli na ye ya liboso ezalaka mpenza pene na lolenge ete akendeke kolála mpongi te mpo na kolóta ndoto, amonaka yango ntango azali ya kolamuka mpenza. Bomoni? Sikawa, ezali likambo oyo Nzambe asengeli kosala. Bomoni, amonaka makambo oyo ezali kosalema.

<sup>109</sup> Mosakoli amonaka liboso na mosika, bomoni, makambo oyo ezali koya. Amonaka kopo ya nkanda na Nzambe, etondi, yambo étondisama. Akoki koloba: “YANGO ELOBI NKOLO!

Nzambe akobebisa engumba oyo soki bobongoli mitema te.” Mpo na nini? Azali mpongo. Akendeke mosika koleka mpenza. Bomoni? Atalaka kuna na mosika mpe amonaka kopo ya nkanda wana kosopana. Yango nde eloko oyo mosakoli atalaka. Atalaka te makambo oyo ezali kosalema awa, atálaka mosika koleka! Alobaka: “Ezali koya!” Akoki komata likoló mpenza na lolenge ete akoki komona elilingi yango. Alobaki: “Mokili ekozala na molili—molili mpe molili makasi.” Azali likoló mpenza, moi ezali kogenga sikawa, kasi azomona elilingi yango koya, mpe azali—azali—azali koloba makambo oyo azali kotala. Ekómi naino awa te, kasi, na ntembe te, ekokóma awa! Ya solo. Ekokóma awa, molili makasi likoló na bato. Ayebi ete ezali koya, mibu mosika, kasi azali komona yango.

<sup>110</sup> Amosa, mosakoli mopakolami ya Nzambe, amonaki mo—molili mpe kosambisama yango. Amonaki Sulia koya ná makálo na bango mpe kobebisa mboka yango, koboma-boma bato. Amonaki yango koya ná kosambisama ya Nzambe likoló na bango, sikawa, mibu ntuku mitano liboso ésalema. Kasi, bomoni, lokola azalaki mosakoli, atómbolamaki na kati ya Molimo mpe amonaki yango na mosika. Bomoni? Amonaki kopo yango, etondi, liboso étondisama.

<sup>111</sup> Lokola Abraham. Nzambe ayebisaki Abraham: “Momboto na yo ekokota na mboka oyo mpe ekofanda awa mibu nkama minei, nsima na yango, nakobimisa bango na loboko ya nguya, mpo lisumu na nko ya ba-Amola etondi naino te.” Bomoni? Nzambe ayebaki ete kopo yango ekotónda. Azalaki kosolola na mosakoli na Ye, sikawa Alobaki na ye: “Omoni kopo oyo ya ba-Amola kuna,” bomoni, “kasi masumu na nko na bango etondi naino te, Abraham. Koloba eloko moko te mpo na yango sikawa, kanga motema, kasi ekoya. Ntango kopo na bango ekotonda, mpe mibu nkama minei wana ekokoka, Nakobengana bango lokola mayoyo liboso na bino, mpe Nakotia momboto na yo awa na mboka oyo.” Amen! Oyo wana nde mosakoli ya Nkolo.

<sup>112</sup> Sikawa, ntango alobelaka emononeli na ye, ézala nantina na nkanza to ézala na ntina na lobiko na nzoto, ekoki na yango koumela, kasi esengeli kokokisama soki alobi yango na Nkombo na Nkolo. Bomoni? Ekoki kozala lipamboli oyo asakoli mpo na yo. Akoki koyebisa yo likambo moko boye, mpe okoki komona yango mpenza te. Okoloba: “Ekosalema ndenge nini? Ee, ezali. . . Na—na—na. . . Ayebisaki ngai: ‘YANGO ELOBI NKOLO, “Likambo oyo ekosalema, mpe likambo wana ekosalema,” mpe yango esalemi te. Moto yango azali na libunga!’ Sikawa, okosambisama mpo oboyi kondima Yango, kasi ekosalema ata bongo! Bomoni? Esengeli kosalema!

<sup>113</sup> “Atako eumeli,” Biblia elobi, “kasi ekoloba na eleko na yango.” Ekokokisama.

<sup>114</sup> Mosakoli azali kaka kotala mosika mpe komona likambo

moko. Azolobela makambo oyo azali kotala. Azokanisa na ntina na awa te ná oyo bozali komonana sikawa, azotala eloko nini oyo ekozala. Mpe ntango alobi yango, soki ezali na kati ya Liloba na Nkolo, esilaki kolobama mpe eloko moko te na mokili ekoki kopekisa yango (bomoni, ezali solo,) kaka Nzambe Ye moko.

115 Bótala, sikawa tomoni ete ntango. . . A—alobaka emononeli na ye, mosakoli asálaka yango. Sikawa, ntango mosusu alobaka makambo ya malamumu, akolobela lobiko na yo ya nzoto. Malamumu, okoki na yo kokanisa: “Yango ekoki kosalema te, namiyokaki na ngai malamumu koleka te.” Na ntango wana, ekosala nini? Yango ekomema kaka kosambisama na Nzambe likoló na yo. Ya solo. Bomoni? Yesu alakaki kobikisa yo soki ondimi Yango; soki ondimi Yango te, eko—ekokómela yo te. Osengeli koyamba Yango, osengeli kondima Yango. Bomoni? Mpe osengeli koyeba esika nini Euti, yango nde ekopesa yo kondima na Nzambe, to na mosakoli na bino. Bomoni? Osengeli kondima Yango.

116 Sikawa tomoni awa ete basakoli oyo balobaki, ba—balobaki mpe makambo oyo balobaki ekokisamaki. Mpe soki nkanda na Nzambe esopami likoló na bato, ezali bobele na eloko moko. . . Soki mosakoli yango alobi ete likambo moko to mosusu ekosalema, ezali na eloko bobele moko oyo ekopekisa loboko na Nzambe, ezali kobongola motema. Kobongola motema epai na Nzambe nde epekisaka nkanda na Ye. Sikawa, kozela yango te, sálá yango nde! Soki Nzambe alobi likambo, sálá yango mbala moko.

117 Hizikiya, kaka ntango ayebaki. . . Azalaki moto malamumu, kasi Nzambe alobaki: “Ntango na yo esili kokoka, Hizikiya, mpe Na—Nasengeli kozua yo. Na—Nalingi ko, Nakolongola yo. Tia ndako na yo mobimba na molongo.”

118 Mpe a—a—alobaki: “Ekozua ngai mibu zomi na mitano mpo na kosala yango, Nkolo.” Bomoni? “Sikawa, ezali Yo. . . Na—na—nayebi ete nazokende, kasi ekozua ngai mibu zomi na mitano mpo na kotia ndako na ngai na molongo. Nakoki kosala yango sika-sikawa te. Na—nazali na ntango ya kosala yango te. Na—na—nakokoka mpenza kosala yango te. Nkolo, tika ete názala na bomoi mibu zomi na mitano mosusu mpo nákokoka kosala likambo oyo. Nakoki te kotia ndako na ngai. . .”

Bomoni, etindá ya Nzambe ezalaki: “Tia ndako na yo na molongo!”

119 Kasi Hizikiya alobaki: “Nakokoka kosala yango na mobu oyo te, ekozua ngai ntango. Nakozongisa *oyo*, nakobongisa likambo *oyo* mpe nakomema yango epai ya moto songolo awa, ekozua ngai mibu zomi na mitano mpo na kosala yango. Bátela ngai mpo násala yango. Tika ná. . . tika ná. . . pesa ngai mwa ntango ya kosala yango.” Bomoni?

120 Bongo Nzambe alobaki: “Nako—nako—nako—nakozala na motema boboto.” Kasi asengelaki kokufa ata bongo, bomoni.

121 Mpe lisusu, azuaki ntango na ye, azongaki nsima, na ntango yango. Bomoni? Mpe alingaki—alingaki kozala malamú koleka soki ákendeke na ye kozanga kotia yango na molongo. Ya solo. Kasi Abakiselaki ye mibu zomi na mitano mpo átia ndako na ye na molongo. Mpo, noki-noki, asalaki nini? Alobaki: “Nkolo, nazalaka malembe. Nasengeli na mibu zomi na mitano mpo na kosala yango. Osili kotinda ngai ete nátia ndako na ngai na molongo. Nakokoka te kosala yango, na mibu zomi na mitano, mpo nadeŋaki niongo awa, mpe nazali na eloko *oyo* awa, mpe nazali na eloko *oyo* ya kosala awa.”

122 Sikawa, azalaki moto mosantu, kasi Liloba na Nzambe esengeli kokokisama ata bongo. Ekokokisama ata bongo, kasi Abombaki Yango mpo na mwa ntango, bomoni, Akangaki Yango mpo na ye. Na nsima, asalaki masumu na ntango nyonso wana. Alobaki: “Nakotika te ete ékómela ye, kasi Nakokitisa yango likoló na bana na ye nsima na ye.” Boyebi lisolo yango.

123 Sikawa, tomoni ete, mbala mosusu, kobongola motema noki-noki ekangaka nkanda mwa moke.

124 Sikawa, tomoni ete Ninive... Nzambe alobaki: “Kende kuna mpe gángela engumba yango sikawa, mpe yebisa bango: ‘Soki... na mikolo ntuku minei, likambo yango ekokweya.’” Mpe, ólalá, babongolaki mpenza mitema! Kaka na ntango oyo bamonaki mosakoli yango kotambola na balabala, azalaki koloba: “YANGO ELOBI NKOLO: ‘Esika oyo ekokweya na mikolo ntuku minei! Esika oyo ekokweya!’” E... .

125 Ata mokonzi atindaki ete bá—bá—bákila bilei na ekólo mobimba, matánga: “Bólata sáki, bópakola putulu! Kaka na mitó na bino te, ná nzoto na bino mpe misuni na bino te, kasi likoló na bibwele na bino ná baniama na bino ya bilanga, bópakola putulu mpe bólata sáki.” Kobóngola motema nini oyo mpenza!

126 Sikawa, ntango tomoni kuna, tomoni ete, soki mosakoli atali malamú mpenza noki-noki te, bomoni, soki alandeli te mpo na kokende epai na Nzambe, bokomona likambo moko wana, soki bokebi te... .

127 Sikawa bótala Yisaya, alobaki kaka lisakoli na ye mpe azóngaki na mwa ndako na ye na lisobe. Mpe, ntango asalaki bongo, Nkolo atikálá lisusu kopesa eyano na mokonzi, oyo azalaki kobondela. Azalaka na lolenge ya kosala makambo. Mosakoli moko azalaki na mboka. Liloba na Nkolo eyaka epai ya mosakoli na Ye. Akendeke kuna mpe alobaki: “Yisaya, zóngá mpe yebisa ye ete Nayoki libondeli na ye. Nasili kosósola ete e... . ete akanisi ete ekozua ye mibu zomi na mitano mpo na kosala yango. Namoni mpisoli na ye mpo azali mpenza na mposa ya kosala mosala yango makasi. Ekozua ye mibu zomi na mitano, ndenge alobi, mpo na kosala yango. Kende koyebisa ye ete Napesi ye yango, kasi.” Bomoni?

128 Mpo na nini? Atindaki—Atindaki Yisaya ákende koyebisa ye: “YANGO ELOBI NKOLO!” Na bongo soki mbongwana moko ezali na likambo yango, to soki eumeli. . . Ekosalema, ata bongo; a—akufaki ndenge moko. Kasi alobaki. . . Soki eloko moko ezali na likambo yango, na bongo Asengeli kozonga epai ya moto oyo Atindelaki YANGO ELOBI NKOLO. Ayebisaki Yisaya: “Kende kuna mpe yebisa ye.”

129 Nzokande, Yona amikambaki ndenge mosusu, amataki na nsóngé ya ngómbá mpe alobaki: “Ee, elingaki kozala malamumu soki nábotamaka ata na ngai te.” Mpe, oh, akobaki mpenza! Mpe Nzambe akolisaki mwa nzete ya ricin mpe esaleli ye mwa elili kino áyokaki mwa mpio kuna na likoló. Kasi alobaki: “Sikawa, tálá, nakendeki kuna, mpe bakoloba ete nazali mosakoli ya lokuta.”

130 Bongo Nzambe asololaki na ye, alobaki: “Tálá engumba oyo kuna! Tálá kuna, Yona, ndenge engumba mobimba ezali kobongola motema, ná saki mpe putulu.”

131 Na bongo Ayebisaki ye na ntina na mwa nzete ya ricin yango mpe nkusu oyo ekataki yango. Mokolo moko, soki Nkolo alingi, nalingi koya na Tabernacle mpo na kosala mayangani kaka na ntina na Yona. Oh, ezali na makambo ya minene mingi mpenza. . . mopepe ya esti oyo ebetaki, ná nyonso wana. Ólalá! Makambo ezali mingi mpenza kuna, yango. . . ezosepelisa mpenza. Mwa biloko ya motuya na kati kuna, nyonso ezali kotalisa, kokokana mpenza. Etalisaka ata Yesu Klisto kati na yango, mpe makambo nyonso mosusu. Na ntembe te, molongo moko na moko na Biblia etalisaka Yesu Klisto. Iyo, mesie. Yango nde liteya na biso ya Lomingo, boye tokomona yango, soki Nkolo alingi.

132 Mpe bótala, ezali na makambo oyo yo. . . Soki ozali sémbu mpe oyebisi Nzambe. . . Sikawa, osengeli kotala malamumu.

133 Sikawa, nalingi kolakisa bino Yona mosusu na etumbelo na mpokwa oyo.

134 Mokolo moko na mpokwa, bato bayaki awa. Mwasi yango akoki kozala (bandeko na bango) awa na mpokwa oyo, boye, nakotángá nkombo na ye te, bokoki koyeba soki ezali nani. Kasi bayáka awa, bato malamumu mpenza, baútaki na Kentucky, mpe ba—bayáká awa mibu ebele. Kasi bato yango, bazali bato malamumu, baninga na ngai ya malamumu. Ólalá, bazalaki—bazalaki mpenza baninga na ngai, kasi ba. . . Ezalaki lolenge ya bato oyo, ntango kolamuka ezalaki naino, bakokaki koya na losambo; ntango kolamuka yango esilaki, mpe mokumba ekomaki mingi, moto moko te azalaki kosala makasi. Mpe bana nyonso bazalaki awa, bakomisamaki na buku oyo ya bana mike, bazalaki na. . . ntango tozalaki na ba-kelasi na biso mpe nyonso wana.

135 Mpe mokolo moko nazongaki na ndako, eleki pene na mibu minei, to mitano, eloko moko ya ndenge wana. Mpe elenge mwasi

yango, (oyo azalaki na mibu pene na mwambe ntango azalaki kati na buku na ya bana awa), asilaki kobala mpe kobota bana mibale. Mpe alalaki na lopitalo awa, pene na liwa. Azalaki pene na sanza minei to mitano, ná mwana; mpe bebé yango autaki kokufa, mpe bakokaki kosala lipasó te mpo azalaki na bokono ya urémie. Mpe bakokaki kosala lipaso te, na bongo basengelaki kotika ete mama mpe ákufa. Bakokaki kosala lipaso te, mpe, bomoni, bebé yango alingaki koboma ye ndenge wana, na bongo bazalaki na . . . azalaki kaka kokende na kokufa, esili, libaku ya kobika ezalaki ata moke te.

<sup>136</sup> Nakendeki kotala ye kuna, atindaki bábenga ngai. Nakendeki na lopitalo, mpe azalaki wana, na kati ya héma ya oxygene. Natombolaki mwa ezipelo na yango, nasololaki na ye mwa moke, mpe nalobaki: “Ozali koyeba ngai lisusu?”

Alobaki: “Na ntembe te, Ndeko Bill, nayebi yo.”

<sup>137</sup> Nalobaki: “Ndenge nini . . . Ozali koyeba makasi ya bokono oyo ozali na yango?”

Alobaki: “Nayebi.” Alobaki: “Yango wana nabengisi yo.”

Nalobaki: “Ee, ee, ezali ndenge nini kati na yo ná Nkolo?”

Alobaki: “Ndeko Bill, na—nazali na . . . na—nabelemi te mpo na kokende.”

<sup>138</sup> Ee, wana, tofukamaki mpe tobondelaki, mpe mama na ye ná mobali na ye, bandeko na bango mingi bazalaki na kati ya chambre yango, mpe mama na ye ná mobali na ye babandáki kolela. Na—na nsima na—natunaki ye, mpe abongisaki bomoi na ye ná Nkolo (apesaki ndayi na ye, azongaki mpe alakáki Nzambe; ete soki alimbisami; ete akolinga Ye mingi; mpe asengaki bolimbisi mpo na masumu na ye, ndenge azalaki kobika liboso), mpe akóbáki kobóngola motema mpe kolela. Nsima na mwa ntango, natelemaki mpe nabimaki na ndako yango.

<sup>139</sup> Mpe na—na ntongo oyo elandaki, babengaki ngai, mpo názonga kuna. Mpe, bamonaki ete, bayaki na ntongo yango, kotala nzoto na ye mpo koyeba ndenge bo—bokono ya urémie yango ekómaki, mpe bamonaki ete atikalaki ata na nzolóko na yango moko te. Nyonso esilaki, ata mbondó moke ya urémie etikaki te, ata moke te. Minganga yango bakámwaki mingi na lolenge ete balobaki: “Ólalá! Ee, oyo, tosengelaki . . . Ezali likambo moko ya kokamwa mpenza.” Balobaki: “Toko—tokobongisa ye,” mpe balobaki, “soki etikali bongo kino lobi na ntongo . . .” Balobaki: “Tokokóba kopesa ye pénicilline,” to nkisi oyo bazalaki kopesa ye, mpo infection yango ébakisama te. Balobaki: “Tokosála lipaso mpo—mpo na kobimisa bebé oyo akufi, liboso ékoma likambo mosusu.” Balobaki: “Soki mama azali malamú, na bongo . . .”

<sup>140</sup> Ee, batalaki lisusu nzoto na ye mbala mibale to misato mokolo yango. Mpe na butu yango, na butu makasi, batalaki



nzoto na ye, bamonaki mabe moko te, nyonso ezalaki kotambola malamumu mpenza. Mpe babongisaki ye. Babimisaki ye na héma ya oxygene. Nyonso ezalaki malamumu. Balingaki kosala ye lipaso na ntongo oyo elandaki, mpo na kobimisa bebé.

<sup>141</sup> Ee, nakendeki kuna. Mpe mpo likambo oyo esalemaki... Sikawa, nayebaki yango ata moke te, nayebaki ata moke te. Nkolo ayebisaki ngai eloko moko te na ntina na yango. Bokoki kotuna bato, soki bolingi. Na bongo bango...ye...Atikalá te koloba ete ekosalema. Kasi, ólalá, komona likambo ya—ya ndenge wana! Lokola mobali na ye azalaki mosumuki, apusanaki mpe alobaki: “Ndeko Branham, na—nalingi kopesa bomoi na ngai na Nkolo Yesu.”

<sup>142</sup> Mpe nalobaki: “Malamumu, fúkama awa mpe símba loboko ya mwasi na yo, na nsima bótambola elongo na bomoi oyo ya sémbá.”

<sup>143</sup> Mama yango ayáki lisusu, alobaki: “Ndeko Branham, oyebi, ngai oyo ná bana na ngai,” alobaki: “biso nyonso tokótáka mpe tobimaka, tokotaka mpe tobimaka, na Tabernacle, mpe nyonso wana. Tofandaka mpe toyokaka yo koteya, tokendeke na etumbelo mpe tozongaka.” Alobaki: “Ngai mpe nazali mozóngi-nsima, Ndeko Branham.” Alobaki: “Nalingi kozonga epai na Nkolo Yesu, mpo na bolamu na Ye epai na mwana na ngai.” Ee, bomoni, e—ezali mpenza kitoko, kasi bayaka epai na Nkolo Yesu mpo na yango te.

<sup>144</sup> Pene na minuít, na ba-gonga ya ntuku mibale na minei to ya liboso, mama na ye animbaki na mpongi. Mpe alobaki, abengaki ye, alobaki: “Mama.”

Alobaki: “Iyo, cheri, olingi nini?”

Alobaki: “Oyebi, nazali na esengo mingi!”

Alobaki: “Nasepeli mingi ndenge ozali na esengo.”

Alobaki: “Nazali na kimia ná Nzambe.” Mpe alobaki: “Oh, ezali malamumu mingi!”

Nsima na miníti moke, abéngaki lisusu, alobaki: “Mama.”

Alobaki: “Iyo?”

Alobaki: “Nalingi kozonga na ndako.”

<sup>145</sup> Mpe alobaki: “Nayebi ete ezali bongo.” Alobaki: “Iyo, cheri,” alobaki, “monganga akobimisa bebé lobi. Nsima na mokolo moko to mikolo mibale, ntango bampota na yo nyonso ekokauka mpe okobima awa, okozonga na ndako mpe okozala lisusu na esengo, yo ná mobali ná bana na yo, okozala Moklisto mpe okobika mpo na Nzambe.”

Alobaki: “Mama, nalingi koloba ete nalingi kokende na Ndako na ngai ya Lola.”

Alobaki: “Na ntembe te, cheri, na nsuka ya mobembo.”

Alobaki: “Lelo nde nsuka ya mobembo.”

“Oh,” alobaki, “sikawa, likambo yango nini?”

<sup>146</sup> Alobaki: “Nsuka ya mobembo.” Bongo alobaki: “Iyo, mama, na miniti moke, nakozala lisusu te.”

<sup>147</sup> Ee, akanisaki ete akómaki kaka na motema likoló mpe na bilobela. Abengaki infirmière, infirmière atalaki ndenge azalaki kopema. Nyonso ezalaki malamú. Mpe na miniti mitano, azalaki lisusu te, akufaki.

<sup>148</sup> Na bongo ntango nazóngaki na ndako, mpóso moko to mibale nsima na yango. . . Nakanisi ete Ndeko Graham nde ateyaki na matánga ya elenge mwasi yango. Ntango nazóngaki na ndako mpe Meda ayebisaki ngai ete elenge mwasi yango akufaki na butu wana, ólalá, nakokaki te. . .

Na—nakendeki kotala mama na ye. “Iyo.”

<sup>149</sup> Mpe na—na—nayebe te eloko nini etindaki ngai násala bongo, kasi nalobaki: “Nkolo Nzambe, O—Osengeli kolimbolela ngai yango,” (Bomoni?) “nsima na ngai kokende kuna mpe—mpe kosolola na mobali wana, mpe andimelaki Nkolo nsima na Yo kosalela ye makambo wana, mpe nyonso wana, na bongo kozua bomoi ya elenge mwasi yango ndenge wana.” Nalobaki: “Osengeli kolimbolela ngai yango.”

<sup>150</sup> Soki oyebisi Nzambe likambo ya ndenge wana, Akotika yo. Ngai. . . Azali na niongo na ngai ya eloko moko te. Ngai nde nazali na niongo na Ye. Ee, Atikaki ngai bongo mwa mikolo, boyebi. Mpe, nsima na sanza misato to minei, mokolo moko nazalaki pembeni na mai mpe Nkolo asololaki na ngai na emononeli, mpe alobaki: “Sikawa kende epai ya mama na ye, mpe lobá boye na mama na ye: ‘Ntango na ye ekokaki te mobu moko liboso na yango, ntango azalaki kozinda na mai, na piki-níki? Asengelaki kokende na ntango wana, kasi Nasengelaki kozua ye ntango alengelamaki kokende.’ Yango wana nyonso wana esalemaki mpe ntina oyo okendeki kuna.”

<sup>151</sup> Bongo nafukamaki mpe naleláki. Nalobaki: “Nkolo Yesu, límbisa ngai, mosali na Yo ya elémá. Nasengelaki koloba bongo ata moke te, Nkolo.”

<sup>152</sup> Mpe nazongaki epai ya mwasi yango, azalaki kofanda awa na Balabala Market, nakendeki epai na ye, mpe nalobaki: “Nalingi kotuna yo motuna moko.”

Alobaki: “Likambo te, Ndeko Bill.”

Nalobaki: “Ezali ya solo ete mwana mwasi yango alingáká kozinda na mai?”

<sup>153</sup> Alobaki: “Ya solo, Ndeko Branham.” Alobaki: “Mobali na ye ná bango—basengelaki kobimisa ye na mai.” Alobaki: “Basengelaki kosalela respiration artificielle ná pression, mpe basengelaki kozua masíni moko mpe kopompé ye mpo na kobimisa mai kati na ye.” Alobaki: “Azalaki na jupe na nzoto. Bazalaki kosala píki-níki. Azalaki kuna, anyatiki na esika moko

ya zelo, aselumwaki mpe motó na ye ebambanaki na nsé, mpe akangamaki péma na kati ya mai. Bango bazalaki komona ye te. Na mbala moko bamonaki ye komata mpe kozinda, mpe bakendeki mbangu na kati ya mai, bazuaki ye mpe babimisaki ye.” Mpe alobaki: “Alingaki mpenza kokufa.” Alobaki: “Ye. . .”

Nalobaki: “Ezalaki ntango na ye ya kokende.”

<sup>154</sup> Bomoni, Nzambe ayebi eloko oyo Azali kosala. Sikawa, ntango mosusu Nkolo alingaki koyebisa ngai yango soki nálobaka ndenge nalobaki te, ete: “Nkolo, Ozali na niongo na ngai, ya koyebisa ngai na ntina na yango.” Azali na niongo na yo ya eloko moko te!

<sup>155</sup> Nazalaki na liyangani moko mokolo moko na mpokwa mpe nayokaki evangeliste moko kobondela mpo na mobeli moko, alobaki: “Nzambe, napesi Yo mitindo ete óbikisa moto oyo!” Nani apesaka Nzambe mitindo? Bomoni? E—e—ezali te—ezali ata mayele te, bomoni, mpo ete—ete Nzambe, A—Asalaka oyo Ye alingi kosala.

<sup>156</sup> Potopoto ekoki—ekoki koloba na mosali mbeki: “Mpo na nini osali ngai boye?” Bomoni? Ata moke te! Kasi soki mosakoli afandi kimia mpe aluki eyano epai ya Nkolo, eyano ezalaka nde wana. Bomoni?

<sup>157</sup> Kaka lokola moto oyo azalaki kotuna motuna na—na—na ntina na momboto na nyoka, bomoni. Tala kaka—kaka malamumu, mpe ko—ko—kowela-wela mingi te. Na bongo, sikawa, Nzambe asalaka ntango nyonso ete makambo nyonso étambola malamumu mpo na bolamu ya baoyo balingaka Nkolo.

<sup>158</sup> Sikawa, soki—soki Ninive bábongolaka motema te, bitumbu ya Nzambe elingaki kozala likoló na bango. Sikawa bómikanisela, mosakoli asengeli koyoka. Ezalaki likebisi.

<sup>159</sup> Sikawa, ezali ndenge moko mpo na ekólo oyo. Na bongo bokoloba: “Ndeko Branham, mokolo ya Lomingo eleki, olobaki ete ‘Elikia ezalaki te?’” Iyo! “Mpo na nini?” Eboyaki mbela na yango. Esengeli koyamba yango. Ekoyamba yango. Ntango moko ekoya, oyo ekólo oyo ekopanzana biteni-biteni. Namonaki yango na mobu 1933. Bomoni, natalaki na mosika.

Bolobaki, bokokaki koloba: “Ee, esalemaki te, na ntango wana.”

<sup>160</sup> Kasi ekosalema! Mussolini akómaki naino mokonzi te, Ligne Maginot etongamaki naino te, motuka na lolenge ya liki ezalaki naino te na mikolo wana, ná makambo mosusu, basi bavotaki naino Président oyo azali lokola é—mwana ya kelasi te, ná makambo mosusu nyonso wana, Président ya Mokatoliko azalaki naino te, mpe bongo na bongo, oyo emononeli yango elobelaki. Eleki pene na mibu ntuku misato, to koleka, makambo yango elobamaki liboso, kasi Alakisaki ngai kaka mosika, kino na nsuka.

<sup>161</sup> Mpe wana likambo yango ezali koya, moke-moke, kopo yango ezali kotonda! Mpe kobongola motema esili koteyama na Billy Graham, Oral Roberts, ná bamosusu. Basakoli, mpe bongo na bongo, basili kotambola na ekólo mobimba, ná bilembo mpe bikamwa, mpe ezali kokoba kopotana kati na masumu. Yango nde ntina oyo bazali kobongola mitema te, kobongola motema nde ememaka yango.

<sup>162</sup> Bótala, Akaba abongolaki motema te na mpámela ya Eliya. Soki Akaba ábóngolaka motema mpe átambolaka na bopolo liboso na Nzambe, likambo yango elingaki kosalema ata moke te. Kasi Akaba akendeke kuna, abotolaki elanga ya vínyo ya Naboti mpe abomisaki ye, mpe asalaki makambo ya mabe nyonso oyo. Mpe Yezabele. . . Mosakoli yango akendeke kuna ná YANGO ELOBI NKOLO! Kasi basalaki nini? Mwasi yango alukaki kaka koboma ye. Eloko nini esalemaki? Lisakoli na ye ekokisamaki, ba-mbwa baliaki ye mpe balémbolaki makila ya Akaba. Kokokana mpenza na liloba na ye! Amónáká kopo yango, kotonda.

<sup>163</sup> Yango nde ntina oyo elenge Mika wana, ntango alobaki likambo yango moko, ndenge nini akokaki kopambola oyo Nzambe asiláká kolakela mabe? Bomoni, li—liloba na ye, lisakoli na ye, elongobanaki ná Liloba.

<sup>164</sup> Elode, atikalá kobongola motema te ntango Yoane alobaki: “Mobeko epesi yo nzela ya kozua mwasi ya ndeko na yo te!” Atikalá kobongola motema te. Kasi asalaki nini? Mwasi na ye aséngaki moto ya mosakoli yango. Bótala bosoto oyo akotaki kati na yango. Bótala likambo oyo ekómelaki ye. Bótala, ata lelo, na Suisse, lokola baboyaki Ye, mai ya—ya bulé yango ezali kotoka kino lelo, lokola e—ékaniseli. Bomoni, na ntembe te, abongolaki motema te ntango Nkolo apámelaki ye. Yoane ayebisaki ye, oyo ye azalaki ezalaki na ntina te (ázala procureur, to eloko nini; to empereur, to moto nani), asengeli kobongola motema ntango Nzambe abengi, soki te nkanda na Nzambe ekokita likoló na ye!

<sup>165</sup> Mbala boni epai ya basakoli. . . Nakomaki yango awa, kasi tokozua ntango te mpo natikali na miníti zomi.

<sup>166</sup> Soki kobongola motema ezali te, boye kosambisama nde ekolanda, na ntembe te! Hizikiya abongolaki motema. Bomoni? Ninive ebongolaki motema.

<sup>167</sup> Akába atikalá kobongola motema te. Nebukadanesala atikalá kobongola motema te. Bato ya ntango ya Nowa batikálá kobongola motema te, mpe kosambisama esopanaki mpenza. Bomoni? Kasi Akebisaka liboso bato nyonso. Moto nyonso azuaka likebisi.

<sup>168</sup> Sikawa, lokola ntango ekómi pene, tika ete moto nyonso oyo amiyoki ete likebisi moko ezali, ábóngola motema nokinoki liboso nkanda na Nzambe ébeta.

169 Sikawa, tómema yango na Branham Tabernacle. Bomoni, tosili komona makambo oyo mpe toyebi ete ezali Solo. Toyebi ete Ezali mpenza Solo. Etínda ya Liloba ezali: “Soki obongoli motema mpe ozui libatishi na Nkombo na Yesu Klisto mpo na bolimbisi ya masumu na yo, okozua likabo ya Molimo Mosanto. Mpamba te elaka yango ezali mpo na bana na bino ná baoyo nyonso bazali mosika.” Bomoni?

170 Sikawa, moto moko, M. Dauch, atunaki ngai awa eleki ntango molai te, alobaki: “Ndeko Branham, nabandi kokóma mobange. Nabandi kolemba, mibu ntuku libwa na moko.” Alobaki: “O—okanisi ete na—nabelemi mpo na kokufa? Okanisi ete nabelemi mpo na kokende? Okanisi ete nabikisámí?”

171 Nalobaki: “M. Dauch, osilá kokende epai ya—ya monganga mpo na kotalisa nzoto?”

Alobaki: “Iyo.”

172 “Mpe oyebisaka ye...Sikawa, oyo monganga asálaka, azalaka na buku moko wana, azuaka buku yango mpo na koyeba. ‘Sikawa, likambo ya liboso oyo nasengeli kosala epai ya moto yango ezali, kolandela motema na ye.’ Na bongo, akozua stéthoscope mpe akotia yango na matoi mpe akolandela kobetabeta ya motema na ye.” Nalobaki: “Bongo, likambo ya mibale oyo akosala, akoluka koyeba tension na ye, ná—ná esalelo ya kofina loboko na ye. Na nsima likambo elandi oyo akosala, akozua ndambo ya masuba, ná eloko soko mosusu nini, mpe akozua ye mwa makila, ná biloko nyonso ya ndenge na ndenge. Akotala nyonso wana, mpe soki amoni eloko te. . . Akosala radio. Soki amoni eloko moko te, akoloba: ‘M. Dauch, ozali—ozali na nzoto kolongono.’

173 “Azali kofandisa yango likoló na moboko nini? Likoló na moboko ya makambo oyo ekomami na buku na ye ya monganga, ete soki eloko moko ezali kotambola malamú te, kokokana na moto na science mokonzi, ekotalisama awa, ekosala likambo oyo awa, ekosala likambo wana kuna. Na yango, na boyebi nyonso oyo azali na yango na ntina na yango, ozali na bokolongono, bomoni, na nzoto.

174 “Sikawa,” nalobaki, “na likambo oyo, na—nakoluka koyeba bokolongono bwa molimo. Bomoni? Mpo na molimo, Nzambe azalaka kaka na Esalelo moko, ya solo, yango ezali Liloba na Ye. Yango ezali Liloba na Ye. Mpe Yesu alobaki, na Santu Yoane 5:24 ete: ‘Ye oyo akoyoka Liloba na Ngai.’ Sikawa, *koyóka* wana elingi koloba kaka te koyoka makelele. *Koyóka* wana elingi koloba ‘koyamba Yango.’ ‘Ye oyo akoki koyamba Liloba na Ngai,’ amen, ‘ye oyo akoyoka Yango!’ (Kofanda kimia te, koloba: ‘Oh boléma, makambo wana, ezali na ntina moko te. Nandimaka yango te.’) ‘Ye oyo akoyoka Liloba na Ngai!’ Ah—hah. Ezali Liloba na Yesu, elingi koloba, Azali Liloba. Yango wana mpenza. ‘Soki okoki koyoka Liloba na Ngai,’ Alobaki, ‘mpe ondimeli Ye oyo

atindaki Ngai, asili kolongwa na kufa mpe koingela na Bomoi; mpe akoleka ata na Kosambisama te, kasi asili koleka na yango.’ Amen!” Nalobaki: “Motema na yo ezali kobeta ndenge nini sikawa?”

Alobaki: “Nandimi Yango. Nasili koyoka Yango. Nasili koyamba Yango.”

<sup>175</sup> Nalobaki: “Na bongo, kokokana na Spécialiste Mokonzi, Opérateur Mokonzi, Monganga Mokonzi ya Bomoi na Seko, alobi: ‘Olongwe na liwa, okoti na Bomoi mpe okokweisama ata moke te.’”

<sup>176</sup> Alobaki: “Ntango nayokaki yo koteya na ntina na Nkombo na Yesu Klisto mpo na libatizi na mai, Nakotaki na mai mbala moko nsima na yo mpe obatisaki ngai.” Alobaki: “Ngai... Moto oyo nazaláká liboso, nazali lisusu moto yango te. Likambo moko ekomelaki ngai. Nazaláká kokipé likambo Yango te mpe nalandaki nzela mosusu, kasi nabalukaki mpo na kobanda kolanda nzela oyo. Mpe motema na ngai epelaka butu-moi mpo nápusana pene na Ye koleka. Nandimaka Liloba moko na moko na Yango! Nalobaka ‘Amen!’ na eteni moko na moko na Yango. Ata Ezokisi ngai ndenge nini, nalingaka kokokana na Yango. Mpe, na boyebi na ngai nyonso, nasalaka yango.”

<sup>177</sup> Nalobaki: “Emonani lokola motema na yo ezali kobeta malamau mpenza. Na—nandimi ete, na molimo, ozali na makoki sikawa.”

<sup>178</sup> Alobaki: “Namitunaka soki, ntango Konetolama ekosalema, nakoki kokende kati na yango, Ndeko Branham?”

Nalobaki: “Ezali ngai te moto nasengeli koloba nani akokende to nani akokende te.”

<sup>179</sup> Alobaki: “Ee, nakosepela kozala na bomoi, nalingi—nalingi komona Konetolama mpenza.”

<sup>180</sup> Nalobaki: “Malamu, tika nájala oyo Buku ya Science elobi awa, mpo na yango, mpe science ya molimo awa.” Nalobaki: “Ee, Elobi boye, na Batesaloniki ya Mibale, mokapo ya 5, Elobi: ‘Biso baoyo tozali na bomoi mpe totikali mpo na Boyei na Nkolo, tokokende liboso te’ (elingi koloba ‘kopezisa’) ‘baoyo bazali kopema, baoyo balali. Mpamba te kelelo ya Nzambe ekoyula, mpe baoyo balali to bazali kopema bakolamuka liboso, bakolata kozanga-kufa. Na nsima, biso baoyo tozali na bomoi na mokolo wana, na ntango wana nsima na bango kosekwa, bomoni, na bongo tokobongwana na mbala moko, na kobeta ya liso, mpe tokokutana ná bango; na nsima, tokomata mpo na kokutana na Nkolo na mipepe, tokonétolama elongo ná bango.’ Ézala olali, ézala olali te, ézala olali to olali te; esika nyonso oyo bakundá yo, soki bakundá yo ata moke te, okosekwa ata bongo! Eloko moko te ekoki kokanga yo. Okozala wana!” Nalobaki: “Ndeko Dauch, soki Yesu azongi te liboso na bankoko ya bankoko ya bankoko ya bankoko ya bankoko na ngai, okozala wana, ata bongo, na

ngonga yango mpenza, mpe okozala wana liboso bátikala ata kobóngwana, soki bakokende.” Ya solo. Amen!

<sup>181</sup> Lipamboli moko ezali koya, kaka ndenge nkanda moko ezali koya. Oh, tosengeli kozela moko na yango na mpokwa oyo. To osengeli to kozela ete nkanda ékita likoló na yo mpe mpo na libebi, to osengeli kozela lisekwa ya Nkolo Yesu. Nzambe moko oyo alakaki moko na yango, alakak- . . . Nazali na esengo mpenza!

Nazali kozela boyei ya mokolo ya esengo oyo  
ya Millennium,  
Ntango Nkolo na biso oyo apambolami akoya  
kozua Mwasi-na-libala na Ye oyo azali  
kozela;  
Oh! Motema na ngai ezali na mposa mpe ezali  
kokimela, kozela mokolo oyo ekokangolama  
na boboto,  
Ntango Yesu na biso akozonga na mokili.  
Na bongo, lisumu mpe mawa, mpasi mpe liwa  
ya mokili ya molili oyo ekosila,  
Na bokonzi ya nkembo wana, elongo ná Yesu  
na mibu nkóto ya kimia.

<sup>182</sup> Ólalá! “Mpe tokozala libela elongo na Nkolo.” Bomoni? Oyo Nzambe alobi, esengeli kokokisama. “Bakotonga bandako, bakofanda kati na yango. Bakolóna bilanga ya vinyo mpe bakolia mbuma na yango. Bakolona te mpo moto mosusu ásangola yango. Bakolona bilanga na bango moko ya vinyo mpe bakotikalala na yango.” Amen! Amen! “Bakosala mabe moko te to bakobebisa eloko moko te na ba-Ngomba mosantu na Ngai.” Aleluya!

<sup>183</sup> Ntango nzoto oyo ya kufa ekolata kozanga-kufa, li—liwa oyo ekomelama na kati ya elonga, na bongo tokomona Ye ndenge Azali mpe tokozala na nzoto lokola Nzoto na Ye Moko ya nkembo. Oh, ntango nini oyo ezali koya!

<sup>184</sup> Nzambe yango moko mpe basakoli yango moko, oyo basakolaki Liloba na Nzambe, to nkanda oyo ekosopana, oyo ekosopana, balobelaki mpe mapamboli oyo ekoya. Nazali na esengo monene! Nzambe a—abebisaka ata moke te ekólo mo—moko kozanga kokebisa yango. Abomaka ata moto te kozanga kokebisa ye. Mpe sikawa soki Asalaka bongo, tozali na eloko moko oyo esili kokómela biso, kotatolama ya bilembo ya mikolo ya nsuka, oyo ezali elongo na biso, Molimo Mosanto ya nkembo kosaláká katikati na biso, kotondisa lingomba ná Bozali na Ye mpe kotatola Liloba na Ye. Na bongo, Lingomba ezali komilengela mpo na komata na likoló moko na mikolo oyo, na nguya na Nzambe. Mpamba te, ezali likebisi, ya kotia mpembeni bozito nyonso mpe lisumu oyo ekangaka biso na pete, mpo tókoka kopota mbangu na motema molai, na momekano oyo

etiami liboso na biso, kino epai ya Mobandisi mpe Mosukisi ya Kondima na biso.

<sup>185</sup> Nzambe ápambola bino, lingomba! Bókangama na loboko ya Nzambe oyo ebongwanaka te! Iyo, mesie. Soki oyoki Bozali na Ye, kende epai na Ye. Soki eloko moko ya mabe ezali na motema na yo, sémbola yango. Totikali na ntango mingi te, Boyei na Nkolo ekómi pene. Bondimeli Ye? Ólalá! Kuna, ekozala kitoko mingi, boye te? Ntango nini oyo, wana nazali komona babundi ya kala bazotamboláká kuna na kati ya Paradiso! Ólalá! Nazali kozela ngonga yango.

<sup>186</sup> Nakanisi lisusu ntango nayokaki ndeko na ngai koloba, ntango autaki na ngámbo ya mbu, uta na bitando ya bitumba mpe nyonso wana, alobaki: “Babundi ya kala yango, ntango bamonaki Ekeko ya Bonsomi wana, bamatisaki baoyo bakómaki bibosono na likoló mpo bámona Ekeko ya Bonsomi.” Yango nde emonanaka liboso, na masuwa, ntango ozali koya, mpo ezali likoló mingi. “Mpe bamoni loboko wana, kotelema kuna,” alobaki, “mibali yango babandaki kolela. Bingambe mibali yango oyo batelemaki kuna, bakweyaki kuna na likoló mpe babandaki kolela.” Ezalaki nini? Elembo ya bonsomi. Nyonso oyo bazalaki kolinga ntango nyonso, ezalaki nsima na elembo wana.

<sup>187</sup> Oh, kasi ekozala ndenge nini ntango nakoyoka masuwa ya kala ya Siona kobeta losébé na ntongo wana mpe nakomona bendeule kotepa-tepa! Ntango etumba ekosila mpe elonga ekozama, aleluya! Tokozonga na Ndako, esika liwa, lisumu mpe ewelo esili kolóngama; mpe lisumu ekozala lisusu te, liwa ekozala lisusu te, mawa ekozala lisusu te. Nakoki mpenza koyoka ba-siflé kobeta! Oh, tozali kopusana pembeni na Engumba yango. Iyo, misie. Bambonge ezali koya, masuwa ya kala ezali kokota na esika na yango. E Nzambe, sunga biso mpo tobika mpo na ntango wana!

<sup>188</sup> Nkolo Yesu, tozali bato oyo bazali—bazali kosala makasi, ná nyonso oyo ezali kati na biso, mpo na kotambola kati na Pole ya nsango-malamu ya Nsango-malamu na Yo ya nkembo, oyo Okufelaki mpo na kobongisa. Tozongisi matondi mingi mpo na komona, na ntango mabe ya molili oyo tozali kobika kati na yango sikawa, na ngonga oyo, tozali komona bilembo komonana. E Nzambe, wana likomi ekomami na etutú, totondi Yo, Nkolo, ete tozali komona yango mpe koyeba ete lisiko ekómi pene. Tozali koteya, tozali kokatisa ekólo mobimba, tozali komona Yo kosala bilembo ya minene, komitalisa Yo moko mokolo na mokolo, mobu na mobu. Mobu moko te elekaka, kozanga ete bilembo (minene) na Ye ya Bikamwa ébeta mokili. Mpe tozali komona yango, koyeba ete mapinga monene ya Nzambe ezali kokende liboso.

<sup>189</sup> Oh, bazali bato mingi te, kasi etónge ya nguya nini oyo ezali



na Bomo! na Seko! Alobaki: “Bakoleka na kati ya mampinga mpe bakopumbwa likoló na etutú.” Iyo, “mampinga” ya liwa ekosimba yango ata moke te, Akoleka na lombangu na kati na bango. Akopumbwa likoló na “etutú” oyo ekaboli makambo ya mokili ná Bikamwa, bakokota na maboko na Nzambe kino na Seko-na-Seko ya nkembo wana. Nkolo Nzambe, totondi Yo mpo na yango. Toyebi ete ntango ekómi pene.

<sup>190</sup> Nabondeli, e Nzambe, ete na mpokwa oyo, soki bayike bazali awa, baoyo bayebi Yo te, baoyo naino bazuá kimia te. . . Mpe ntango mosusu na mpokwa oyo, wana tozalaki koteya, Mongongo moko ya moke ezalaki koloba na nsé ya mitema na bango, “Nazali koyoka likebisi ete nakoki lisusu kotikala awa ntango molai te.” E Nzambe, tika ete bátia ndako na bango na molongo, sika-sikawa. Tika ete makambo nyonso ébonga. Tika ete malili. . . Ntango mosusu bazali Baklisto, kasi bazangi bobele. . . Babiki na nsé na likambo oyo ntango molai mpenza mpe basili komona makambo mingi mpenza, ba—bayebi lisusu motuya ya likambo Yango te. Ezali. . . Makambo yango, bakómi komona yango mpamba, na esika ya komona yango na bozindo mpenza mpe na bosembo mpenza.

<sup>191</sup> E Nzambe, tika ete tómitalisa na mpokwa oyo, kokisa yango, koyeba ete makambo minene oyo ezali bobele kokebisa biso na ntina na konétolama ya Lingomba oyo ekomi pene. Kasi soki totondi na masumu, ná kozanga kondima, ná goi-goi, tokozanga Konétolama yango. Toyebi yango, Nkolo, na bongo tobondeli ete Ópelisa Molimo Mosanto kati na biso, na kati ya mitema na biso. E Nzambe, pelisa milimo na biso na mapamboli na Yo. Sunga biso ete tósosola.

<sup>192</sup> Sikawa, pambola bato elongo. Pambola mokengeli na biso ya motuya ná mwasi na ye. Pambola basungi, bayángeli misolo, bandimi nyonso, elongo. Limbisa masumu na biso. Bikisa bokono na biso, Nkolo. Mpe pelisa móto na mitema na biso. Mpe tika ete tóbima na esika oyo ná nsango ya likebisi, wana tokokutana na bato ya masumu, mpe tóyebisa bango: “Moninga, ozali koyoka nsoni te ndenge osálaka makambo ya ndenge wana, koyeba ete osengeli kokutana na Nzambe mokolo moko?” Kokisa yango, Nkolo. Natiki bango epai na Yo, sikawa; natiki Nsango, ná biso nyonso elongo, mpo tósala elongo mpo na nkembo na Yo. Na Nkombo na Yesu Klisto. Amen.

Nalingi Ye, nalingi Ye  
Mpo Alingaki ngai liboso  
Mpe Asombi lobiko na ngai  
Likoló na Ekulusu.

<sup>193</sup> Bolingi Ye, boye te? Bókanisa naino oyo tozali. Bótala ndenge tokómi mosika na nzela, baninga. Bóbwaka naino miso na nsima, na nzela oyo totamboli, na ntango ya Luther ná ya Wesley, na kati ya bileko. Bótala awa, esika tokómi: awa na nsonge

ya pyramide; mpenza awa, esika Nzambe asili kotalisa yango polele, ete Biblia, na nzela ya bilembo nsambo, esili komonisama malambe; tozali bobele kozela mabombami nsambo wana sikawa, na nsuka, na ntina na Boyei na Nkolo mpe Konetolama ya Lingomba oyo ekoki kosalema liboso ntongo étana. Ólálá!

Nalingi Ye . . .

Na bosembo sikawa.

. . . nalingi Ye

Mpo Alingaki ngai liboso

Mpe Asombi lobiko na ngai

Likoló na Ekulusu.

<sup>194</sup> Wana na kimia nyonso sikawa . . . Bozali koyeba ete moko na moko na biso awa, asengeli kotika esika oyo, kotika mokili oyo? Boyebi ete moto oyo abotami na mwasi, bomoi na ye ezali mokuse mpe etondi na mpasi? Boyebaki ete lokola tobótámá na nzete ya elanga ya Edene, oyo ya kufa, tosengeli kokufa? Tozali mbuma ya libumu ya mama na biso, mpe tosengeli kokufa, tosengeli kotika bomoi oyo. Elenge tó mobange, bokeseni ezali te. Soki mobali to mwasi ya mobange koleka, awa, atikali na bomoi butu mobimba, ye mwasi akotikala na bomoi, to ye mobali akotikala na bomoi koleka bana mingi ya mibu zomi to zomi na mitano? Bana nkama na nkama bakokufa na mokili mobimba liboso ntongo étana. Boye, oyo ezali na motuya, ezali, ozali kosala nini sikawa?

<sup>195</sup> Oyo ekoki kozala libaku na yo ya nsuka. Elenge to mobange, ozali na makoki ya kokóma na losambo. Kotika te likambo moko etikali kosalema te. Zalá na bozindo ya bosembo. Tiá masumu nyonso ná makambo nyonso pembeni. Talá sémba na miso ya Nzambe mpe túna motuna: “Nkolo, nasepelisaka Yo? Nakoki lisusu kosala nini, Nkolo Yesu? Nakozua lisusu libaku ya kosalela Yo ata moke te, nsima na bomoi oyo kosuka. Oyo nde mbala bobele moko oyo nazali na yango. Nkolo Nzambe, yebisa ngai bobele eloko oyo Olingi ete násala! Soki nasengeli kokende kosala *boye* tó nasengeli kosala oyo *kuna*, nakosala yango na esengo.”

<sup>196</sup> To—tozali kokanisa yango na bosembo? Bana mike bazali kokanisa bongo? Bato ya mibu ya katikati bazali kokanisa bongo? Mibange bazali kokanisa bongo? Bilenge bazali kokanisa bongo? Tosengeli kokende, mpe okoyeba ndenge nini soki biso nyonso tokokende te liboso ntongo étana? Toyebi yango te. Okoloba: “Etungisaka ngai.” Esengelaki te! Na bosolo, esengelaki nde kopesa yo esengo mingi ya koyeba ete olingi kotika mobange ya ndako mabe oyo.

<sup>197</sup> Mokili mosusu ezali. Ozali na ntina ya kokende mosika mingi te. Ezali mpenza elongo ná yo. Ezali mpenza zingazinga na yo. Osengeli kaka . . .yo . . . Nzambe apésá yo kaka biyokeli mitano, ezali mpo na kokutana ná makambo mingi oyo, ya mokili oyo.

Kasi mokili mosusu ezali, oyo ozangi biyokeli mpo na kokutana na yango, okoki kokutana na yango te mpo ozali na yango te.

<sup>198</sup> Ndakisa, nalobaki, mokolo ya Lomingo na mpokwa, (ntango mosusu bosósólaki yango te) oyo . . . tozali na biyokeli mitano: bomóni, boyóki elengi, bomami, boyóki nsolo mpe boyóki. Kasi soki ozangi bomóni (ozali bobele na boyóki elengi, bomami, boyóki nsolo mpe boyóki), mpe moto moko azuaki bomóni mpe alobaki: “Mokili mosusu ezalaka, moi”? Na—na biyokeli yango, otutanaka na biloko, kasi likambo ezali ete, ye akoki koyebisa yo oyo yango ezali. Ee, yo okokanisa ete moto yango abeli liboma, mpamba te ozali na eyokeli yango—yango te, oyo ya—ya bomóni. Moto moko te atikálá kozala na yango, na boyebi na yo. Oyóká bato kolobela makambo ya ndenge wana, kasi otiaka yango ntembe. Kasi biso toyebi, na nzela na eyokeli yango, ete ezali solo. Ezali esika ya solo. Bomoni? E—e—e—ezali esika oyo . . . okoki komona. Eyókeli na yo etátolaka yango.

<sup>199</sup> Sikawa, eloko bobele moko oyo okosala ntango okokufa, ezali ete okobongola bobele biyokeli mitano yango (Nkembo! Fiuu!), ozui kaka nde eyokeli mosusu. Ozali na bomoi ná eyokeli moko likoló koleka, eleki oyo mbala nkóto na nkóto, na bomoi mosusu; bomoi moko esika oyo kufa ezali te, esika oyo mawa ezalaka te. Mpe makambo oyo oyebi eloko moko te na ntina na yango sikawa, okomona yango polele mpenza ntango okokatisa kuna. Ozali kososola yango te sikawa mpo ozali kotutana na yango, ozali na eyokeli yango te. Okoloba: “Na—nazali komiyoka ndenge mosusu awa na mpokwa oyo. Nazali komona lokola ete . . . Nakómi na mposa ya kolela, to kogánga, to eloko moko.” Ezali Banje ya Nkolo. Bomoni?

<sup>200</sup> Lokola moto oyo akoloba, boyebi, oyo atikálá kozala na eyokeli ya bomoni te, akoloba: “Mbala na mbala nayokaka eloko moko ya solosolo mpenza, koyoka lokola mwa móto.”

Yo okoloba: “Ezali moi.”

<sup>201</sup> “Moi ezali nini? Natikálá komóna yango te.” “Ezalaka te . . .” Bomoni, atikálá komóna yango te, ayebi te oyo yango ezali. Bomoni, moto moko kuna asengeli koyebisa ye, moto oyo akoki komona yango. Ólalá! Bomoni?

<sup>202</sup> Tobóngwani kaka. Tobóngwani kaka, bóbangaka liwa te. Liwa ezali na yango eloko moko te kaka dongolamíso. Yesu alongaki yango. Ata ntango Polo akómaki na nsuka, alobaki: “Kufa, wapi esweli na yo? Wapi nsómo na yo? Nkunda, wapi elonga na yo? Olobi ete ozui ngai? Na—nalingi kotalisa yo kuna na Yelusaleme. Ezali na nkunda moko polele kuna mpe ‘Ngai nazali Ye oyo alóngaki yo, ná liwa ná ewelo,’ mpe nazali kati na Ye mpe okoki kokanga ngai te! Nakosekwa.” Ólalá! Alobaki: “Motóle moko ezali kozela ngai, oyo Nkolo, Mosambisi sembo, akopesa ngai; mpe kaka ngai te, kasi baoyo nyonso *balingi* komonana na Ye.”

203 Bolingi Ye. Bolingi komona Ye koya. Bozali kozela Ye. Ezali lisolo molai, ezali—ezali kozela ya ntango molai. Ezali likambo ya bolingo. Kasi okoki mpenza kozela te, kino okomóna Ye! Ólálá! Wana nde ndenge ezali. Oh, wana nde ntango oyo tozali kozela, yango nde ngonga yango! Soki motema na yo ezali ndenge—ndenge—ndenge wana te na mpokwa oyo, moninga, kébá. Bomoni? Kébá. Kotika te ete monguna ákosa yo. Soki Molimo Mosanto oyo ezali na kati awa Elingi kopumbwa mpo na kokende epai ya Mokeli na Yango, epai ya Nkolo na Yango, ezali likambo ya bolingo, oyo moto moko te akoki kolobela yango. Ya solo, ezali ya solosolo. Ezali ya solosolo.

204 Boye soki likebisi moko ezali, koloba ete: “Obelemi te mpo na yango,” na bongo kobosana te, ntango mosusu Nzambe nde azali kobongisa yo mpo na likambo moko. Bomoni? Obongami te. . .

205 Okoloba: “Ee, soki nazui libatizi ya Molimo Mosanto, na bongo, ee, ntango mosusu Nkolo akozua ngai?” Te, kaka yango te, ozali kaka nde kobeleva mpo na kozala na bomoi. O—obelemi te mpo na kozala na bomoi kino ózua Molimo Mosanto, na bongo ntango ozui Molimo Mosanto, na bongo osili kolóngobana mpo na kozala na bomoi. Obongáki naino te mpo na kozala na bomoi, liboso na yango, bomoni, kasi sikawa obongi mpenza mpo na kozala na bomoi, nsima na yo kozua Molimo Mosanto. Bomoni? Azali kosala ete ómilengela. Bomoni?

206 Bato balobaka: “Ee, nasengeli komilengela mpo na kokufa.” Ólala, ngai nazomilengela mpo na kozala na bomoi! Amen. Likambo ezali, milengela mpo na kozala na bomoi, zalá na bomoi kati na Klisto! Bomoi ya elonga likoló na masumu, kufa, ewélo, ngai nasíli kozua elonga. Azali Elonga na ngai mpe ngai nazali ndangá na Ye, mpe nazali ndangá ya Elonga na Ye. Amen! Ezali bongo.

207 “Oyebi ndenge nini ete ozali na Yango?” Nazali na Yango. Amen. Ye moto apesaki ngai Yango na ngolu na Ye. Nayokaka Yango. Nayebi Yango. Namonaka Yango kosala na bomoi na ngai. Ebongólá ngai. Mpe kokokana na Buku oyo awa, Alobaki ete nazalaki na Bomoi na Seko mpe nakoki koleka na Kosambisama te, kasi nasíli kolongwa na kufa mpe koingela na Bomoi mpo Azuaki kosambisama na ngai mpo na ngai. Mpe soki Afutaki ntalo, komeka komema ngai na Kosambisama moko te. Ye asilaki kozua yango mpo na ngai, mpe ngai nayambaki yango. Iyo, mesie.

208 Boye, kosambisama ezali lisusu te. Kufa e—ezali lisusu te. Oh, nasengeli kotika lingomba mpe kotika bato mokolo moko, kasi yango. . .soki Yesu aumeli. Mpe soki esalemi, ee, ólálá, nakufi te. Ngai nakoki kokufa te, nazali na Bomoi na Seko. Ndenge nini okoki kokufa ná Bomoi na Seko? Bomoni? Okozala ntango nyonso Liboso na Nzambe mpe okozala elongo na Ye

libela! Amen! Esalaka motema na ngai nsai, epesaka ngai mposa ya kobanda koteya lisusu. Bomoni? Ya solo. Oh, Azali Malamu mingi!

Azali malamumu, malamumu, malamumu mingi, boye te?  
 Yesu Nkolo na ngai azali malamumu mingi, boye te?  
 Miso emoni, matoi eyoki, makambo oyo ekomami na Liloba na Nzambe;  
 Yesu Nkolo na ngai azali malamumu mingi, boye te?

Nalingaka litatoli yango.

Miso *emoni*, matoi *eyoki*, makambo oyo ekomami na Liloba na Nzambe;  
 Yesu Nkolo na biso azali malamumu mingi, boye te?

<sup>209</sup> Oh, nalingi Ye! Azali Kimia na ngai, Bomoi na ngai, Elikia na—na ngai, Mokonzi na ngai, Nzambe na ngai, Mobikisi na ngai, Mo... (Ólálá!) Tata na ngai, Mama na ngai, Ndeko na ngai ya mwasi, Ndeko na ngai ya mobali, Moninga na ngai, nyonso na ngai! Bomoni? Tozaláká koyemba mwa loyembo moko ya ndenge wana. Boyebi, bino nyonso bosilá kozua mwa banzembo wana ya ba-Pantekotiste lokola...Nabanzi ete bakangaki magnetophone wana. Hmm. Tozaláká koyemba loyembo nini?

Azali tata na ngai, mama na ngai, ndeko na ngai ya mwasi mpe ndeko na ngai ya mobali, Azali nyonso mpo na ngai.

Azali nyonso, Azali nyonso mpo na ngai;  
 Azali nyonso, Azali nyonso mpo na ngai;  
 Mpo Azali tata na ngai, mama na ngai, ndeko na ngai ya mwasi mpe ndeko na ngai ya mobali,  
 Azali nyonso mpo na ngai.

<sup>210</sup> Bozali koyeba lisusu ntango tozaláká koyemba yango? Moto moko kati na bino azali koyeba yango lisusu? Ólálá, eleki mibu ebele! Na bongo, tozaláká koloba:

Nayebi ete ezalaki Makila, nayebi ete ezalaki Makila,  
 Nayebi ete ezalaki Makila mpo na ngai;  
 Mokolo moko, ntango nabungaki, Akufaki na Ekulusu,  
 Mpe nayebi ete ezalaki Makila mpo na ngai.

<sup>211</sup> Bozali koyeba lisusu mwa loyembo yango? Tótala naino, mosusu oyo tozaláká koyemba ezalaki nini? Tótala naino.

Oh, olingi kosenzela elongo na ngai ngonga  
 moko te,  
 Wana nazali kokende kuna, wana nazali  
 kokende kuna?  
 Oh, olingi kosenzela elongo na ngai ngonga  
 moko te,  
 Wana nazali kokende kobondela kuna?  
 Nazali kolonga, nazali kolonga,  
 Nazali kolonga, nazali kolonga;  
 Mpo nalingi Yesu, Azali Mobikisi na ngai,  
 Mpe Aseki, bongo Alingi ngai mpe.

<sup>212</sup> Kalakala, Ndeko Smith, ndeko mobali ya moindo, azalaki kofanda awa na litúmu. Oh! nazalaki koyoka bato moindo wana kuna, nazalaki kofanda wana mpe kogánga, kolela ná nyonso wana, koningisa mpenza motuka na ngai mpe kopumbwa zingazinga na yango, ndenge wana. Bango nyonso bazalaki kobeta maboko.

Oh, olingi kosenzela elongo na . . .

Mwa eyembeli ya bato moindo, boyebi. Moto moko te akoki koyemba lokola bango; bómeka kutu te. Bomoni?

. . . na ngonga moko,  
 Wana nazali kokende kuna, . . .

<sup>213</sup> Ólalá! Nazalaki kofanda wana, nalobaki: “E Nzambe!” Mwa mwana mobali oyo, ya mibu pene na ntuku mibale, Nazalaki kopota mbangu zinga-zinga na motuka yango, kogánga ná kosanzola Nzambe ndenge wana. Oh, ntango nini oyo! Oyo wana ezalaki kaka ebandeli mpenza, ntango Nzambe azalaki kosala kati na bato ndenge wana. Sikawa, tokómi na Lingomba ya makasi. Ezali na bandimi mingi te, kasi ezali na nguya na Molimo. Amen. Ezali na nguya monene!

<sup>214</sup> Lisusu, ezalaká na mwa loyembo moko . . . Nayebi lisusu mokolo moko, kuna na Chattanooga, na Tennessee, ntango nakutanaki na . . . Chattanooga te, ezalaki na Memphis, esika nakutanaki na mwa mwasi wana ya moindo, boyebi, oyo azalaki ya kotelema kuna. Bosilá koyoka ngai kolobela yango, boyebi. Mwana na ye ya mobali azalaki na maladie vénérienne. Akangaki elamba ya mobali wana na motó na ye, ayekamaki na lopango *boye*. Mpe Nkolo atelemisaki mpépo wana kuna, mpe aboyaki kotika yango ékende, na ndenge moko boye, mpe bayebisaki ngai ete nakende. . . Mpe Molimo Mosanto alobaki: “Tambola mwa moke mpe kende na nzela *oyo*.”

<sup>215</sup> Mpe nakendeki kotambola kuna, koyembáká. Namilobelaki: “Ólalá, mpépo na ngai pene na kokende!”

<sup>216</sup> Akobaki koloba: “Koba kotambola. Koba kokende. Koba kokende.” Kaka na ebandeli ya lotomo na ngai.

<sup>217</sup> Mpe natalaki, ayekamaki na etutu ya lopango kuna, na mwa ndako moko, mwa esika moko kuna. Ndeko mwasi moko ya mokoló atelemaki wana. Oh, azalaki... Azalaki lokola moko na bandeko basi oyo batiá na carton ya Tantine Jemima. Azalaki na matama ya minene mpenza, boyebi, mpe nsuki na—na ye, chemize na ye ekangami na ndenge ya nsima. Ayékamaki na ekuke ya lopango ndenge wana, mpe ngai... Nazalaki koyemba mwa loyembo oyo ya...mwa...Ezalaki nini... Nabosani nkombo ya mwa loyembo oyo nazalaki koyemba. Sikawa, ezalaka na eloko moko na ntina na—na... Ezalaki mwa loyembo moko ya ba-Pantekotiste, ya mwa yubile.

<sup>218</sup> Mpe natikaki koyemba, napusanaki pembeni mpenza. Mpe nalekaki pembeni. Atelemaki wana mpe mpisoli ezalaki kotanga na matáma ya minene yango; nalingaki koyamba ye. Alobaki: “Mbote, mokengeli!”

Nalobaki: “Tantine, olobi nini?”

Alobaki: “Nalobi: ‘Mbote, mokengeli.’”

<sup>219</sup> Nalobaki: “Oyebi ndenge nini ete nazali mokengeli?” Sikawa, mpo na bato na Súdi, elingi koloba “motei”, boyebi. Nalobaki: “Sikawa, oyebi ndenge nini ete nazali mokengeli?”

Alobaki: “Nayebaki ete ozalaki koya.”

<sup>220</sup> Nalobaki: “Oyebaki ete nazalaki koya?” Namilobelaki: “Oh-oh, ebandi, omoni.”

<sup>221</sup> Alobaki: “Iyo, mesie.” Alobaki: “O—osila kotánga lisolo yango na Biblia, mokengeli, na ntina na mwasi Mosuneme wana?”

Nalobaki: “Iyo, tantine, natángá yango.”

<sup>222</sup> Alobaki: “Nazalaki lokola mwasi yango.” Alobaki: “Nasengaki na Nkolo ete soki Apesi ngai mwana, ngai ná mobali na ngai, nakobokola ye mpo na Ye.” Alobaki: “Asalaki yango, Apesaki ngai mwana yango.” Mpe alobaki: “Nabokolaki ye, mwana malamú.” Alobaki: “Akómaki kotambola ná baninga ya mabe, mokengeli. Azuaki bokono ya mabe,” mpe alobaki, “alali na kati ya ndako pene na liwa. Ekokisi mikolo mibale oyo azali kobunda na liwa. Esali mikolo mibale oyo makanisi na ye ezongi te. Monganga azalaki awa mpe alobaki: ‘Akoki kobika te,’ alobaki, ‘azokende na kokufa.’” Ezalaki bokono ya bandumba, bomoni. Alobaki: “Nazalaki kokoka ata moke te komona mwana na ngai kokufa, mpe nabondelaki butu mobimba.” Mpe alobaki: “Nalobaki: ‘Nkolo,’ alobaki, ‘Nazali lolenge ya mwasi oyo mwasi Mosuneme wana azalaki, kasi’ alobaki: ‘wapi Elisa na Yo?’”

<sup>223</sup> Mpe alobaki: “Nalálaki mpe nalótaki ndoto moko, ete natelemaki awa na ekuke oyo, mpe namonaki yo ozali koya na balabala ná mwa ekoti wana, lokola na mopanzi ya motó na yo.” Kasi alobaki: “Ezangi kaka eloko moko,” alobaki, “wapi...” Alobaki: “Osengelaki kozala na sanduku moko na loboko na yo.”

Nalobaki: “Natiki yango kuna, na Hotel Peabody.”

224 Alobaki: “Nayebaki ete osengelaki kozala na sanduku moko.” Mpe alobaki: “Mwana na ngai azali kobunda na liwa.”

Nalobaki: “Nkombo na ngai Branham.”

Alobaki: “Nasepeli kokutana na yo, Mokengeli Branham.”

225 Nalobaki: “Nabondelaka mpo na babeli. Otikálá koyoka na ntina na lotomo na ngai?”

226 Alobaki: “Te, nandimi te ete natikálá koyoka yango.” Alobaki: “Okolinga kokota te?” Mpe nakotaki.

227 Engambe mobali yango alálaki wana, ndenge wana. Nazalaki koluka kosolola na ye na ntina na lobiko na nzoto kouta na Nzambe, kasi wana etalaki ye te. Azalaki na mposa ya koyoka elenge mobali yango koloba ete “abikisami mpe abelemi mpo na kokende.” Bongo alobaki... Mpe Nzambe abikisaki mwana yango.

228 Mpe pene na mobu moko nsima na yango, namonaki ye kuna, lokola momemi sanduku na gare. Tala ndenge Nzambe asalaka makambo!

229 Na nsima, ntango nazóngaki, nsima na yango, nasengelaki... mpépo yango esengelaki kokende na ngonga ya nsambo, mpe ngonga ekómaki pene na libwa na ndambo. Nazuaki taxi mpe nazóngaki. Mpe kaka ntango nakótaki, balobaki: “Mbela ya nsuka mpo na mpépo motángo *songolo-pakala*.” Nkolo moto akangaki mpépo yango na mabelé, wana ngai nakendeki kobóndela mpo na mwana wana. Bomoni? Yango mpenza.

230 Nazalaki komeka kokanisa mwa loyembo oyo: “*Moko Na Bango*.” Yango mpenza. Oh, ndenge tomesánáká koyemba yango makasi awa, mpe kobeta maboko. Tozaláká koloba:

Moko na bango, moko na bango,  
Nazali na esengo mingi ya koloba ete nazali  
moko na bango; (Aleluya!)  
Moko na bango, nazali moko na bango,  
Nazali na esengo mingi ya koloba ete nazali  
moko na bango.

Basangánaki na chambre ya likoló,  
Bango nyonso bazalaki kobondela na Nkombo  
na Ye,  
Babátisamaki na Molimo Mosanto,  
Mpe nguya ya mosala eyaki;  
Sikawa ndenge Asalaki mpo na bango mokolo  
wana  
Akosala ndenge moko mpo na yo,  
Nazali na esengo mingi ya koloba ete nazali  
moko na bango.



Moko na bango, moko na bango,  
 Nazali na esengo mingi ya koloba ete nazali  
 moko na bango;  
 Moko na bango, nazali moko na bango,  
 Nazali na esengo mingi ya koloba ete nazali  
 moko na bango. (Boye te?)

231 Bóyoka molongo oyo:

Ata bato yango batángaki te mpo bákóma  
 ndenge bazalaki,  
 To bazalaki komikumisa mpo na lokumu ya  
 mokili te,  
 Bango nyonso bazuaki Pantekote na bango,  
 Babatisamaki na Nkombo na Yesu;  
 Mpe bakómi sikawa koyebisa yango na bisika  
 nyonso,  
 Nguya na Ye ezali mpenza ndenge moko,  
 Mpe nazali na esengo mingi ya koloba ete  
 nazali moko na bango.

Oh, moko na bango, nazali moko na bango,  
 Nazali na esengo mingi ya koloba ete nazali  
 moko na bango;  
 Moko na bango, oh, nazali moko na bango,  
 Nazali na esengo mingi ya koloba ete nazali  
 moko na bango.

Oh, yaka, ndeko na ngai, koluka lipamboli  
 Oyo ekopetola motema na yo na masumu,  
 Ekosala ete bangonga ya esengo ébanda kobeta  
 Mpe ekobatela móto na molimo na yo;  
 Oh, ezali kopela sikawa kati na motema na  
 ngai,  
 Oh, nkembo na Nkombo na Ye,  
 Mpe nazali na esengo mingi ya koloba ete  
 nazali moko na bango. (Bozali na esengo mpo  
 na yango?)

Moko na bango, moko na bango,  
 Nazali na esengo mingi ya koloba ete nazali  
 moko na bango;  
 Oh, moko na bango, moko na bango,  
 Nazali na esengo mingi ya koloba ete nazali  
 moko na bango.

232 Oh, bozali na esengo, boye te? Tópesana mbote ya loboko,  
 wana tozali koyemba yango. Bolobi nini? Tósala yango.

Moko na bango, moko na bango,  
 Nazali na esengo mingi ya koloba ete nazali . . .  
 (Nazali na esengo mingi, ndeko.)

Oh, moko na bango, moko na bango,

Nazali na esengo mingi ya koloba ete nazali moko na bango.

Oh, yaka, ndeko na ngai, koluka lipamboli  
Oyo eko . . . móto na molimo na yo,  
Oyo ekosala ete ba-ngonga ya esengo ébanda kobeta  
Mpe ekobatela móto na molimo na yo;  
Oh, ezali kopela sikawa kati na motema na ngai,  
Oh, nkembo na Ye . . .

Tótombola maboko.

. . . esengo ya koloba ete nazali moko na bango.

233 Biso nyonso elongo:

Moko na bango, moko na bango,  
Nazali na esengo mingi ya koloba ete nazali moko na bango;  
Nazali moko na bango, moko na bango,  
Nazali na esengo mingi ya koloba ete nazali moko na bango.

234 Bóyoka lisusu na bokebi sikawa, bomoni.

Ata bato yango ba—batángaki te mpo bákóma,  
(Bayekolaki na kelasi ya likoló te.)  
To bazalaki komikumisa mpo na lokumu ya mokili te,  
Bango nyonso bazuaki Lipamboli na bango ya Pantekote,  
Babatisamaki na Nkombo na Yesu;  
Mpe bakómi sikawa koyebisa yango na bisika nyonso, (Na bisika nyonso mpenza.)  
Nguya na Ye ezali naino ndenge moko,  
Nazali na esengo mingi ya koloba ete nazali moko na bango.

235 Oh, bóyemba yango, lingomba!

. . . bango, moko na bango,  
Nazali na esengo mingi ya koloba ete nazali moko na bango;  
Oh, moko na bango, moko na bango,  
Nazali na esengo mingi ya koloba ete nazali moko na . . .

236 Zua mwa muswále na yo sikawa.

Moko na bango, moko na bango,  
Nazali na esengo mingi ya koloba ete nazali moko na bango;  
Oh, moko na bango, moko na bango,  
Mpe nazali na esengo mingi ya koloba ete nazali moko na bango.

237 Nkembo na Nkolo! Amen! Tozali mpenza lokola bana mike. Tozali na eloko ya momesano te. Nzambe azali na lolenge te. Boye te? Iyo, misie!

Nazali moko na bango, moko na bango,  
 Nazali na esengo mingi ya koloba ete nazali  
 moko na bango;  
 Nazali moko na bango, moko na bango,  
 Oh, nazali na esengo mingi ya koloba ete nazali  
 moko na . . .

238 Ozali mpenza na esengo ya koloba yango? Tómbola kaka loboko, loba: “Nkembo na Nkolo!” [Losambo balobi: “Nkembo na Nkolo!”—Mok.] “Nkembo na Nkolo!” Nazali na esengo ete nazali moko na bango! Nazali na esengo ya kozala.

239 Nkolo Nzambe, nazali mpenza na esengo. “Moko na bango, moko na bango, nazali na esengo mingi ya koloba ete nazali moko na bango.” E Nzambe, sunga biso mpo tókóma bongo. Sunga biso mpo tósala ete Minda yango ékoba kongenga, Nkolo, wana tozali kokende na Siona. Kokisa yango, Tata. Na Nkombo na Yesu, topesi Yo bomoi na biso mpo na mosala. Amen. Amen.

Oh, tozali kokende na Siona,  
 Oh, Siona kitoko, kitoko;  
 Tozali komata kino na Siona,  
 Engumba kitoko ya Nzambe.  
 Toya, biso baoyo tolingaka Nkolo,  
 Mpe tótalisa esengo na biso,  
 Bóyemba elongo na biso loyembo ya boboto,  
 Bóyemba elongo na biso loyembo ya boboto,  
 Boye, tózingela Ngwende  
 Mpe . . .

Oh, bóyemba na Molimo!

. . . Ngwende.

Oh, tozali kokende na Siona,  
 Siona kitoko, kitoko wana;  
 Tozali komata kino na Siona,  
 Engumba kitoko ya Nzambe.  
 Oh, tozali kokende na Siona,  
 Siona kitoko, kitoko;  
 Tozali komata kino na Siona,  
 Engumba kitoko ya Nzambe.

Tika ete baoyo baboyi koyemba  
 Baoyo bayebaki Nzambe na biso te;  
 Kasi bana ya Mokonzi na Likoló,  
 Kasi bana ya Mokonzi na Likoló,  
 Bátalisa esengo na bango na bapaya,  
 Bátalisa esengo na bango na bapaya.


240 Tóyemba yango!

Tozali kokende na Siona,  
 Oh, Siona kitoko, kitoko;  
 Tozali komata kino na Siona,  
 Engumba kitoko ya Nzambe.

<sup>241</sup> Oh, ezali kopesa bino makasi, boye te? Bolingaka ba-nzembo wana ya kala, boye te? Na—nakosepela kozala na yango na esika ya nyonso oyo bokoki . . . to banzembo nyonso mosusu oyo bokoki kozala na yango. Ezali banzembo kitoko ya kala, ya sembo. Ólala! Namiyokaka malamú mpenza mpe na esengo, ntango nayembaka yango, malamú mpenza! Ólala, nayoki mposa ya kosepela!

Mema Nkombo na Yesu,  
 Mwana na mawa ná bolozi;  
 Ekopesa yo esengo mpe libondisi,  
 Oh, mema Yango bisika nyonso okokende.  
 Nkombo kitoko, (Nkombo kitoko!) O ya boboto! (O ya boboto!)  
 Elikia ya mokili mpe esengo ya Lola;  
 Nkombo kitoko, O ya boboto!  
 Elikia ya mokili mpe esengo ya Lola.

<sup>242</sup> Wana togumbi mitó sikawa:

Tokokumbamela Nkombo na Yesu,  
 Tokofukama na makolo na Ye,  
 Tokolatisa Ye motóle ya Mokonzi na bakonzi na Lola,  
 Ntango mobembo na biso ekosila.  
 Kitoko . . . (Olingi kosukisa?) . . . O ya boboto!  
 Elikia ya mokili mpe . . . 

63-0724 Nzambe Abengaka Moto Te Na  
Kosambisama Kozanga Kokebisa Ye Liboso  
Branham Tabernacle  
Jeffersonville, Indiana U.S.A.

LINGALA

©2024 VGR, ALL RIGHTS RESERVED

VOICE OF GOD RECORDINGS  
P.O. Box 950, JEFFERSONVILLE, INDIANA 47131 U.S.A.  
[www.branham.org](http://www.branham.org)

## Liyebisi ya makoki ya mokolo-eloko

Makoki nyonso ekopesama na ndingisa. Búku oyo, ekoki kozala imprimé na masíni ya ndako mpo na yo moko to kokabama, ofelé, lokola esalelo mpo na kopalanganisa Nsango Malamú ya Yesu Klisto. Búku oyo ekoki kotekama te, koyíkanisama te, kotiana na site internet te, kobombama mpo na kolukaluka te, kolimbolama na nkota mosusu te, to kosalela yango mpo na kosenga misolo te, kozanga ndingisa ekomami mpenza na Voice Of God Recordings®.

Soki olingi koyeba makambo mosusu to kozua bisalelo mosusu, koméla:

VOICE OF GOD RECORDINGS

P.O. BOX 950, JEFFERSONVILLE, INDIANA 47131 U.S.A.

[www.branham.org](http://www.branham.org)